

東仙詩鈔三編全

69  
103

0 1 2 3 4 5 6 7 8 9 10 11 12 13 14 15 16 17 18 19 20 21 22 23 24

始







東山詩鈔三編

全

大正 6. 5. 1 寄贈

丁巳王正 八十翁鳴鶴書



發行所

六子	二〇	頁
六六	一九	行
六三	一八	誤
六一	一六	正
六〇	一五	
五九	一四	
五八	一三	
五七	一二	
五六	一一	
五五	一〇	
五四	〇九	
五三	〇八	
五二	〇七	
五一	〇六	
四〇	〇五	
三九	〇四	
三八	〇三	
二八	〇二	
一八	〇一	

正誤表



碩

果

八十七號



東仙詩鈔三編序

東仙竹內翁自少喜作詩。至老弗衰。六十餘年間所作至一萬二千餘首。何其盛也。其詩不弄纖巧。不銜新奇。直抒性情。極自然之妙。有陸放翁之風。其集彙已刻初編二編。今又將刊三編。哲嗣松治君携來見示。且徵序。聞翁今年七十有九。矍鑠如壯者。優游林下。日以吟哦爲事。余謂如翁真能樂於詩者也。余觀世之詩人者。往々苦吟力索。彫肝琢腎。勞其神思。以求工巧。其詩未必工。而其氣力已衰矣。是苦於詩者。而非樂於詩者也。豈不戾于風雅之甚乎。夫詩之爲道。適吾性情而已。歡愉愁苦。各隨所遇。稱心而言。無所事矯飾。則其中未嘗不綽々有餘。故其

發於辭者沛然不可止而心神怡悅自合養生之法放翁之於詩蓋如此故古來詩人之享高年富篇什者以放翁為稱首今翁之悠悠自適老而益壯事物所觸莫不著之篇詠殆駕放翁而上之則其契於斯道也深矣其詩之多且工將益進而不可量豈不偉歟姑書此以祝翁之壽且俟後編之出云。

大正丙辰之冬

櫻泉 小牧 昌業 識

東仙詩鈔三編目次

卷一

明治四十年原稿三百六篇鈔錄七十八篇

明治四十一年原稿三百四十七篇鈔錄六十八篇

卷二

明治四十二年原稿三百二十七篇鈔錄六十七篇

明治四十三年原稿三百三十八篇鈔錄六十三篇

卷三

明治四十四年原稿三百三篇鈔錄七十篇

明治四十五年七月改元大正原稿四百二篇鈔錄七十八篇

卷四

大正二年原稿四百五篇鈔錄七十一篇

大正三年原稿四百十二篇鈔錄六十五篇

卷五

大正四年原稿二百八十一篇鈔錄六十四篇

大正五年原稿四百五十六篇鈔錄八十一篇

合計古今雜體七百五篇

家君自年十五六作詩六十餘年間得一萬二千餘篇明治三十九年前之作節錄為二編刊行四十年訖大正五年十年間所作今者鈔七百五篇為三編以付活板抑詩集附評語批圈此古人所無也其性所近而好之甲以為可而乙為否所見各異譬猶劍鐔與女色好惡係于人故任誦詩者所見而可預附評語批圈不可也家君嘗厭焉此編一切削之因弁其由於卷端

大正六年一月

松 治 識

東仙詩鈔三編卷一

岩代 二本松

竹內貞誠甫著  
松治鈔錄

○明治四十年丁未

丁未歲朝

床頭又挂壽星圖。着藪堆盤酒滿壺。自詫率先書鬱壘。不妨最後飲屠蘇。迎年七袞增踈懶。謝事三朝免拜趨。只賸些々閒口業。嗚將醉吻辨詩逋。

壽星圖一幅。狩野季信畫。林信篤贊。雄峯公題。會祖言柔。每歲首挂之。

偶述似烏谷

庸流多佞佛。誰解本來空。栩栩莊生蝶。泠泠列子風。同歸閒寵辱。一視小窮通。倚伏禍將福。惟當付塞翁。

聞岡迪齋臥病。遙有此寄。

繡腸曾嘔知章詠。沈醉不辭徐邈聖。聞道近來親藥湯。不知酒病將詩病。



二月念二日。初雪自曉至昏不輟。地上一尺許。

龍公初行雪。竟日勢縱橫。笕沒泉無響。枝披樹有聲。貴游爲柳絮。苦學當燈檠。老與人殊趣。掬來茶自烹。

過某氏梅苑

滿苑春風香雪寒。金釵繡帽日成團。相逢盡道看梅去。却被梅花冷眼看。

次韻迪齋立春詩

曆頒新歲月。春入舊山河。初日梅將雪。東風酒欲波。今朝來債鬼。前夕廢驅讎。自嘆才情減。年華奈老何。

陰曆元日。次迪齋韻二月十三日

鄉閭輟業共欣然。衆意渾將春意圓。觴豆羅陳荆婦鬧。衣裳換著女兒憐。聊從習俗爲佳節。又引賀賓鋪宴筵。不怪風塵人易老。一年兩度作新年。

杜居不用杜甫冰雪鶯難至。春寒花較遲。爲韻十首節三

諸蟄猶潛戶。群魚未上冰。已過雨水候。殘寒尙凌兢。東君澤未洽。和風何日興。愁雲低慘々。山椒雪意凝。只伴紅爐火。踈慵倍添增。兀坐推不動。宛

然面壁僧。

不趁圖南鵬。不羨遷喬鶯。自守鳩巢拙。一枝足託生。冥懷忘得喪。無復外物嬰。老骨罹寒疾。兼旬伴藥鎗。今朝病稍開。風暖天氣晴。盆梅花初綻。可以侑吾觥。

東風變朔吹。料峭又生寒。丘隅鶯語澁。雲際雁聲酸。深居養老拙。曾無異患干。已算殘碁了。又披古書看。書不求甚解。碁以寓閒歡。聊且消日子。胸堂天地寬。

春初幽居。迪齋以杜詩水流心不競。雲在意俱遲。爲韻十首見寄。仍

次其韻節三

詞場收老脚。不復追時流。自有閒居樂。而無陋巷憂。詩賦守舊窠。後時類老優。傅粉不入樣。與人風馬牛。昨夜春風到。靄々烟景幽。欲覓新詩料。拄杖向林邱。

世人皆有營。恬退我獨不。園開蔣詡徑。門栽彭澤柳。好風自東來。冰泮雪消後。林幽淡靄籠。嚶々鳥求友。池暖綠波肥。洋々魚携婦。我亦歡有餘。春



意濃於酒。

知足復奚求。不與人奔競。顏狀非故吾。新霜落曉鏡。雖除圭組情。難醫烟霞病。誰同世外游。並鄰吳傳正。往還無虛日。吟酌互相命。一斗詩百篇。亦可稱醉聖。時人謂李白爲醉聖

今泉宗介斷酒索酒戒詩

一盃人飲酒。二盃酒飲酒。三盃酒飲人。不覺濡其首。沈湎自棄身。棄身又誰咎。縱雖不及亂。未如不入口。今汝自斷之。索余銘座右。書之爲相贈。果中肯綮否。

春寒經旬不出二首節一

春風冷。雨雪雱。梅蕊纔含白。柳條猶未黃。閒悶惟須詩料理。殘寒好藉酒禁當。

遊友人山莊分字得了

禽鳴宿雨晴。藹々春山曉。登遊曾有約。步履出林杪。路盡有幽莊。莊壓層崖表。仰視星象近。俯瞰州郭小。清話觥酌闌。松暝歸鶴杳。欲來卜東鄰。塵

事何時了。

春晴步經黑塚登岩峯

旭影映遙林。春陽浮四澤。散策渡長橋。來尋野寺僻。谿訝石窟深。云是鬼婆宅。白日苔氣腥。空餘蒼鼠跡。迴步登岩峯。心形曠然釋。新柳含鶯黃。早梅散雪白。川原相縈紆。歷々聚咫尺。佳處恣游眺。暮烟沒歸翮。

春日幽居

寂寞門蹊屐跡稀。葦苔雨後綠差肥。新流汨々侵低杓。垂柳依依蔭小扉。釀蜜蜂銜飄絮去。營巢燕帶落花歸。可人天氣暮春候。剩買村醪又典衣。

雨中觀花次韻

看花佳處雨勝晴。箬笠油衣得々行。細滴微霑紅頰透。澹烟輕抹艷姿明。太真出浴媚無力。西子洗粧嬌有情。一掃長褰高帽迹。遊塵不浣特鮮榮。

送友人遊西京

我嘗兩度入京師。今日臨岐畧說之。覺川涼樹月生夕。嵐峽曉亭花發時。水木清妍金閣寺。風烟明媚祇園祠。此行却待歸鞭日。合有觀光紀勝詩。

春夢

午倦又催眠。黃鶯莫驚呼。枕頭胡蝶春。行盡江南路。

春日山行

林深春晝靜。數里絕喧紛。宿露花光濕。新晴鳥語欣。燒痕經雨綠。草氣帶風薰。勝踐情無厭。閒行步不勤。小休姑踞石。徐嘯乍驚雲。俯撫歸鴉背。他山已夕曛。

五月五日上京寓松治我善坊宅

彩衣堂上舞斑斕。一見渾忘遠道艱。子婦謹修能養志。穉孫嬉戲以怡顏。鳥烏聲喜和風暖。橋梓陰濃靜晝閒。慰藉倚門千里念。淹留不復夢家山。

訪羽峯南摩翁羽峯憂鬱。予思近視。故前聯及之。

一棧青燈兩鬢絲。相逢清話意逾彌。徒聞世有治鸞酒。未試人云益眼磁。堪嗟學術多流弊。孰任文章起積衰。當此異端方熾日。賴君斯道可維持。

觀上野博覽會。明治十年上野始開博覽會。

三十年前開會始。皆云諸事盡其美。盡美盡善今如斯。三十年前兒戲耳。

逢女婿木野崎東洲二首

君家妻子寓余家。日夜相思天一涯。殷勤臨別無他語。但道平安報阿爺。宿志龍鍾猶未酬。漫々塵海幾沉浮。都門今夜一尊酒。君說羈愁我別愁。

五月十二日。挈松治忠雄。觀亀井戶藤花。

雨餘天氣頗清嘉。夙與兒孫乘電車。借得茶亭觀半日。昔公祠畔紫藤花。

斷梅偶成

輕々輕雷雨始晴。陰雲開駁旭光生。將雛乳燕離巢影。過母新篁解籜聲。一甌露茗晨思爽。八尺風漪午夢清。從是送梅天氣好。茆茨鮮潔愜幽情。

雷雨

白雨滂沱至自東。奇峯忽壞晝溟濛。叢雷奔激起驚電。迅鷁退飛隨疾風。屋角無端懸短瀑。山腰驚地挂輕虹。望中開霽天收怒。萬斛炎塵一洗空。

白燕

差池豈敢近雕籠。雅淡不施鈿粉紅。玉壘呢喃形叵辨。霓裳旋折舞還工。泥香巷口梨花雨。春冷池塘柳絮風。楚々羽衣唯著素。嫌他文采誤吾躬。

不忍池觀蓮花次迪齋韻

小湖當盛夏。幽賞在清晨。觀月橋頭曉。辨天祠畔春。鮮粧真絕世。淨植自無塵。爲看花君子。相携酒聖人。

夏日游水榭次迪齋詩韻

露頂脫紗巾。披襟發興新。清風醒耳孔。白晝爽心神。石氣琴含濕。泉香硯起津。寒瓜浮碧玉。活斲斫紅鱗。六月無些暑。三庚最可人。此中宜結夏。詩酒與成隣。

夏日山居終日無客坐臥任意不知炎暑爲何物偶以熱散由心靜爲韻得五言長律五首

四圍皆好峯。庭戶自清潔。石仄激寒泉。洞深存古雪。忘機禽意馴。遠跡足音絕。永日愛高閒。終年甘散拙。嘗聞行氣方。未試燒丹訣。宛似住冰壺。不知城市熱。

蕭々林徑幽。寂々人烟斷。怪石自生雲。喬松遙入漢。地清蚊蚋無。風起蠅蟬亂。靜坐意偏涼。閒眠身不汗。正當三伏仍。却訝九秋換。宛似踏層冰。何

須飛雪散。

峯巒巧障日。戶牖已探秋。風意浮湘簟。泉香入茗甌。不追河朔飲。豈羨葛洪游。地邃炎威退。林深夜氣留。有詩來枕上。無事到心頭。宛似逃樊鳥。閒身得自由。

煌々早爲虐。鑠石又流金。虛室涼颺入。空階爽氣深。雲山披潑墨。澗水瀉鳴琴。久矣塵機息。而無俗物侵。煎茶消午倦。隱几且閒吟。宛似坐冰井。何爲瓜鎖心。

遐蹤絕世氣。解慍迎修景。自覺古風存。殊憐閒日永。伴他烏有翁。住此無何境。竹氣入簾香。松陰遮暑冷。鳴蜩暑不知。宿鶴涼先警。宛似隱寒溪。心身俱澹靜。

迪齋以我愛夏日長爲韻賦長律五篇見示諷咏一過頗覺爽快因步其元押雜書近况

人皆苦鬱蒸。趨避全由我。門徑僻而幽。松筠繁且夥。風檐散帙看。石榻橫琴坐。探借九秋涼。驅除三伏火。寡營延命方。多欲錮身鎖。縱不俗流容。豈

東仙詩金三編 卷一  
云吾計左。餘生就廣閒。百事任疎惰。幸免鬼揶揄。解衣盤礴裸。  
少年嫌夏長。老後翻歡愛。竹露淨嬋娟。松雲晴黠黠。盆池鏡影明。篔簹水琴  
聲碎。涼似故人來。暑如殘吏退。雖逢煩熱時。如處混元代。靜默道機微。蕭  
閒塵事廢。呼茶澆渴腸。覓句搜枯肺。收得自由身。到頭無籍在。  
寂寞鎖柴門。略同僧結夏。小臺開月欄。淺瀨抗風榭。清爽頗欺秋。幽陰猶  
訝夜。茂林匝地連。宿露多時下。遣興酒良媒。消閒詩善價。無復一身忙。占  
斯終日暇。何關人是非。不聽俗嘲罵。童子尙知名。云是東仙舍。  
投老不棲々。何由消永日。開窓好嶂來。鑿石清泉出。傍水種荷菱。遶園移  
果實。考槃懷碩蕩。寄傲抱微質。彷彿浣花溪。依稀陶令室。親烹飯後茶。暫  
閣吟餘筆。安心是秘方。避暑無他術。頑強似少時。海屋籌添七。  
結廬池北地。瀟洒趣偏長。住似寬閒野。離於禍福鄉。參天梧竹淨。出水芰  
荷香。土木菴中散。寒酸孟漂陽。幽棲當白晝。空室有微涼。題罷撚鬚句。傾  
來濡甲觴。誰知貧裏樂。自笑靜中忙。小築雖然陋。奧如無暑光。

次韻陸放翁夏日晚興詩五首節二

手汲清泉注硯池。筆牀茶竈晚來移。坐當北渚風生處。待得東峯月出時。  
小鼎香浮煎雀舌。新詩吟就寫烏絲。豁然胸次無微累。此樂々於榮啓期。  
溪泉號々入方池。又向池頭床勢移。墜尾扇閒殘照底。越蕉衫健早涼時。  
露翻清影迸荷背。螢曳流光穿柳絲。浴後一杯如換骨。不須大棗羨安期。

次韻劉基夏日雜興五首節二

冷竹幽松綠繞池。清漣白石境相宜。林風忽起蟬先默。山雨欲來蛙早知。  
老體不嫌炎熱候。快心翻勝迓寒時。黃昏露坐太踈暢。一領輕衣着葛絲。  
窓開三面對閒池。九夏無爲與靜宜。雨洗林塘眠裡過。涼生枕簟夢中知。  
儘因老懶消長日。自覺頑痴倍幼時。世上炎威侵不得。秋霜已落鬢邊絲。

大島貞益寓鎌倉長谷賦此遙寄二首

白浪清沙灣又灣。自然風致出塵寰。梵臺今日殘僧少。華表千年化鶴還。  
漁唱相傳新月浦。樵謳互答夕陽山。果知卜築詩爲識。七里灘頭竹石間。  
形勝依然占上流。興亡百世兩悠悠。荒涼草樹鎌臺夕。縹緲烟波繪島秋。  
沈劍無人潮勢怒。鬪契有跡鳥聲愁。知君憑弔當年事。勿獲明珠惜暗投。

偶述每句用論語語

血氣既衰霜鬢催。孜孜鉛槧竭吾才。欲從先進末由也。獨抱遺經久矣哉。常無求飽甘蔬食。曾不患貧守草萊。樂以忘憂仍忘老。有朋時自遠方來。

七月十五日夜舟遊。每句用前赤壁賦中語。

山川相繆鬱蒼々。白露橫江秋氣涼。雙艚破波凌萬頃。孤舟載月泝流光。飄々乎御長風逝。渺々兮將外物忘。共挾飛仙游不極。杯盤浪藉夜渠央。

日下部鳴鶴七十壽詞

投冠高踏譽彌彰。齡屆古稀身健康。一世逃名逃不得。終生樂道樂難量。壯哉筆下驅鯨鱷。久矣人間見鳳凰。幸得同庚辱私好。蕪詞敢祝壽無疆。

訪隱士

橋橫獨木叵容車。四面皆池水繞家。看取亭々不染色。曉風開遍白蓮花。

答人問

摸做明清枉費思。古人妙處豈能知。寫出真情無澤色。看為平易復奚疑。八月十四日書事

蠻風日熾世徇利。人情儉薄不知媿。代天誅戮賣國奴。神州士氣未墜地。

秋日雜詠五首節二

吾生與世馬牛風。不道悲秋感不窮。遠塞霜飛天欲雁。閒庭露冷夜催蟲。新詩那競雕龍巧。暮齒敢為捫蝨雄。土木形骸渾委順。徜徉浮白殺青中。曉起襟懷特地嘉。宵來一雨較涼些。風翻碧藕不多葉。露濕胡枝無數花。世上殘碁爭失鹿。閒中散墨事塗鴉。曲突烟生炊未熟。沙甌且試社前茶。

十六夜

桂香薰徹小書欄。漸見冰蟾出遠巒。隱現全因雲斷續。陰晴未定夜闌干。明輝難認一分缺。幽賞纔償前夕看。坐久酒過平日量。浩然風露不勝寒。

中島逐波挽詞八月三十日

風流遊世久。遊倦返元真。悟却老儒佛。了然形影身。著書長不朽。遺墨最堪珍。白玉樓何處。應為作記人。

次韻迪齋金鐘兒詩

蟋蟀哀鳴何得同。幸然猶免小金籠。開元遺事曰。官女以小

金籠捉蟋蟀聽其聲。

磴稜々勝絲將竹。

調續々非徵與宮。夜靜風前聲瀏亮。秋高月下韻丁東。雨淋鈴曲空零落。遺響安知託此蟲。

七袞自壽七首

齡開七袞尙頑強。造物多情容這狂。二頃先疇給餽粥。數椽舊屋寄林塘。終生不遇窮東野。暮齒同庚老孟光。子克持家無後顧。祖宗儉德有餘慶。六十年來念々非。退居不復踐危機。幽棲略既知今是。老境無端屆古稀。計拙何爲營兔窟。時清只合着蓑衣。閒中猶有閒公事。雨則繙書晴釣磯。孤學依然白髮增。蕭寥心跡在家僧。踈才自嘆無攸悟。末技堪慚有過稱。對客不談當世務。讀書猶伴幼時燈。十年間得二千首。六十年至六十九年。得二千五百餘首。此事惟應詔友朋。

回憶曩時如隔晨。世途敦歷幾艱屯。微衷曾建勤王議。衆劾翻爲越俎人。投筆驅馳戎馬際。明治戊辰之役。執經講說杏壇春。奉教職殆二十年。即今渾付黃梁夢。老辣徒懷薑桂辛。

少壯浪奔輕遠遊。船南馬北幾春秋。山河登涉三千里。笠屐經過廿五州。

古剎崇祠皆歷訪。名區勝壤也窮搜。如今幽夢猶難覺。往蹟依稀現枕頭。功名不必畫麒麟。放浪形骸已七旬。酒僅三蕉情頗適。詩垂萬首句皆陳。予自年十五六學作詩。今五十餘年。得九千餘首。縱無靈藥可醫拙。賴有碧翁能憫貧。說與親交宜賀我。醉歌長作太平民。

霜雪皤然上鬢絲。猶欣筋力未全衰。諸兒相賀椿萱壽。內子同庚。初度恰逢黃菊期。予生辰九月十七日。與其撮影倩他技。不若傳神入小詩。杖國從今人所許。步行何待杖扶持。

次韻迪齋秋日田家

日夕醞晴收穫天。闔鄉無處不欣然。野碓水車秋确々。叢祠神鼓晚田々。鴉銜殘穗爭相噪。牛向閒坡飽自眠。新稻初登新醞熟。土公賽罷設醪筵。

偶題壁上

天壽人間豈偶然。省心寡欲乃延年。誰能痛飲稱名士。我是踈頑屬懶仙。自有烟霞歸掌內。曾無龍藏到門前。平生未試燒丹術。瘦骨稜々抵老堅。西嶽雪意

斜陽慘愴北風號。雲擁山巒氣勢豪。知道甌峯催雪意。新寒頓逼木綿袍。  
雁字次友人韻  
紫塞霜初落。排空鏡畫橫。臨摹人不及。變化鬼當驚。屈曲蘊爲篆。連綿草帶行。傳將千里信。堪慰遠征情。

秋盡

白露淒其物性傷。秋匆匆去也何忙。錦衣零落楓人瘦。鵲殼按搓橘子香。  
處世無成嗟歲晚。觀書有味喜宵長。老來偏羨放翁健。愛此冬初萬瓦霜。  
十一月十六日月照上人五十回法會賦此換奠香

憂國丹衷抵海深。欲回皇運慰宸襟。南溟終古眞如月。照徹上人未死心。

送岡迪齋之播州

明治十一年予游播播

觀風今日向播州。相送聊先說昔游。明石城荒喬木合。人丸祠古白雲幽。  
老松秋月高砂浦。細雨春帆舞子洲。預識錦囊新有獲。無由携手作賡酬。

寒夜書感

萬籟深沉四境虛。疎々飛霰迸階除。不才幸免烏臺禍。有命豈投光範書。

瘦骨怯寒如病鶴。長懷廢睡類鰥魚。新詩一首寫愁絕。坐到香消燈灺初。

友人某罷官歸話舊

少壯眞無幾。匆匆到白頭。君今拋印綬。我已卜林泉。久別各驚老。相逢先問年。談及戊辰難。死灰猶欲燃。

丁未歲晚

滿天風雪掩柴荆。無賴年光若電驚。素業傳兒令紹述。先疇付客乃耘耕。  
餘生總謝尋常事。一夢空過七十程。堪笑祭詩窮措大。煮蔬沽酒設杯罍。  
丁未除夕

暮景駸々感又加。馬齡添壽髮添華。文章無補焚身象。歲月難回赴壑蛇。  
豆倍常羞粗已辨。酒償殘債復相賒。燈前坐覺春風到。遠膝諸孫笑語譁。

○明治四十一年戊申

戊申歲旦

藹然和氣物皆蘇。長少團欒宴席鋪。衰眼生花過椒酒。春風帶草換桃符。  
門前舊雨又今雨。鏡裡新吾非故吾。老後頽唐無傑思。詩詞依樣畫葫蘆。

霞城懷古維新後設製絲場

春風又起昔時霞。故址摧頽野草遮。虎踞龍蟠空逝水。荒丘古木只啼鴉。  
纔因殘礎認遺構。無復百官趨正衙。女輩不知當日事。縑絲聲裡夕陽斜。

雪夜憶墨水舊遊次韻迪齋

敲冰小鼎自煎茶。偶憶曾游一夢賒。牛女祠前花滿樹。金龍山下玉埋沙。  
中流青舫尋詩客。兩岸紅燈賣酒家。今夜蕭然禪榻畔。孤愁對雪鬢成華。

時事有感鐵道爲國有。烟草爲官業。故後聯及之。

時風數變道彌污。觸物中懷空鬱紆。一月餘寒梅未發。三冬無雪麥將枯。  
業收商賈財猶乏。稅及油鹽衆亦瘠。兩院幾多參政士。不知何策答唐虞。

春日田家

池塘水暖淡生烟。正是浴蠶沉種天。春事從今追日鬧。桑畦鋤了又秧田。

讀新聞紙書感次迪齋韻

國家多冗費。財政日將非。官吏慣溫飽。黎黔號凍饑。食言增雜稅。當路致  
群譏。節用須休養。無憑戰勝威。

喧然彼已譏。言行兩相違。所賴朋多寡。何論事是非。慕羶群蟻聚。飽肉小  
鷹飛。不管國休戚。惟謀輕與肥。

出遊

手挈奚囊踐勝忙。黃鶯鼓吹動詩腸。午烟纔剩塔三寸。春水新添篙半強。  
楊柳遮蹊巾影綠。梅花滿地屐痕香。韶光九十難辜負。醉詠從今知幾場。

時事有感官禁私採薇

春風吹老首陽薇。山下飢民烟火稀。周召協同何泄邇。京華裘馬盡輕肥。

春日寄友

風暄衆禽喜。雨潤百花滋。遇此好時節。悵然反成悲。美人阻千里。信絕鴻  
與鯉。分襟猶如昨。忽已經數紀。別時俱少年。意氣輕離別。男兒四方志。功  
名何足說。若人懷耿介。不被俗流容。寄跡風塵際。旅食猶龍鍾。我亦事出  
遊。才踈身困否。浩然賦歸田。龜陰卜棲止。人生僅百歲。爲樂能幾度。人事  
何有限。聞健須欵晤。何當歸結隣。俱爲兩家翁。花朝秋月夕。詩酒重相同。  
情已不可極。言亦不可盡。長跪付郵筒。粲然應一哂。



春漁

桃花浪穩繫輕篷。午睡菁騰酒一中。不識魚吞鈎餌去。長竿移在綠楊東。

次韻迪齋彼岸櫻

春風微峭獨嫣然。二月東台雨後天。地屬上方塵氣絕。節逢彼岸淚粧妍。朝陽素質溫於玉。暮夜真姿淡似烟。淨土託根身不染。早開殊占衆櫻先。

高砂翁媪圖

竹帚芒鞋福履新。松陰淨掃自無塵。人間難得雙眉壽。和樂同襟靄似春。

浪華城懷古

吉夢維何日入胸。祖宗有靈生此公。一任奇相類猿面。總攬英雄真英雄。削平禍亂護京師。七道侯伯此會同。餘威遠震明韓地。長絕外夷窺日東。當時卜築浪華地。百堵新興土木工。城池深高極壯麗。金湯海宇稱無雙。嗣子未壯公易簣。後事付託兒婦翁。婦翁心籌欲代之。虛飾固辭不聽從。百方離間君臣際。威福由已位望隆。孤兒寡婦何能爲。託言鐘銘卽興戎。一舉媯和填周池。再舉輒成建棄功。連雲樓櫓付一炬。牙城纔剩舊穹窿。

君不聞浪華事業亦夢耳。遺詠想公大度風。又不聞婦翁後裔來據此。異葉霸圖一朝空。果報有理天好還。追憶往事感無窮。嗚呼豐德興替均是夢。公應大笑冥漠中。

舊藩主丹羽長保公夫人祝貞七十賜拍皮拍皮辟鬼魅云

適體拍皮毛色鮮。溫於狐貉軟於綿。老夫不啻防寒具。辟魅能令福壽全。

外孫木野崎吉孝入高等師範附屬中學賦此以與

擔簦入中學。忠孝實身基。歲月不吾待。繫鈿能爾爲。群居須擇友。細席可親師。一語以相勗。書紳莫敢遺。

迪齋寓播州姬路見寄二絕句增爲七律以酬二首節一

東風一夜到天涯。萬里關河會晤差。白鷺城邊春似海。阿熊川上雪如花。勝遊綺席徵名妓。閒釣青蓑泛小舸。行樂各隨居處異。莫親玉樹忘蒹葭。

春日訪友

不辭來路遠。拄杖訪柴關。花綻春風暖。禽鳴白日閒。詩篇披錦肺。觥酌發芳顏。看汝用幽意。從今數往還。

偶步近郊買醉歸二首節一

藤笻桐屐竹皮冠。不駕輕車不跨鞍。老脚逾強行是藥。醜顏尙壯渥非丹。一村花柳詩中趣。數里江山畫裏看。熟路何妨光旣夕。醉歸任步々蹒跚。

迪齋時事有感以感時花濺淚爲韻見寄因步其韻五首節三

閣臣弄威福。稅數益無涯。議士因規利。弊端生盛時。二千圓歲費。貨欲尙增加。不關民利病。訪柳又尋花。廟堂論戰功。濫賞及胥吏。黎氓徒苦勞。心血化爲淚。

賀友人新居落宴

卜得菟裘寄老生。負山臨水好經營。堅牢不要奩輪美。粗樸翻看結構精。茗室向陽冬尙暖。書窓開北夏還清。嘉招欲作新居賦。燕雀先人報喜鳴。

雲雀次韻

凡禽不可與同群。決起聲々直掠雲。今日時風何忍說。欲將何事上天聞。

禁中花

麗質妖姿帶寵光。暖香相雜御爐香。東君亦似副天意。故作春陰護衆芳。

社頭花

花含靈雨爛然開。圍繞階壇香雪堆。不是甘棠皆致敬。無人曾折一枝來。

四月三日亡兒忠治三十三回忌辰二首

有命壽夭何問天。忌辰今值卅三年。九原應抱無窮恨。反使衰翁設淨筵。鬢鬢音容咫尺遠。几前空設舊斑衣。九原休抱無窮恨。先後雖殊終一歸。

四月十日宿松治宅此夕雨

笑酌不知更漏長。女孫猶解勸壺觴。燈花剪盡談無盡。夜雨今宵又對床。

四月十六日拉內子拜伊勢大廟獻神樂

白首重來卅四年。明治八年夏拜大廟參天廟樹罩祥烟。夫妻今日親虔拜。神樂洋洋盈耳邊。

訪某山人

老厭市朝事。少懷丘壑心。功名何敢望。富貴不能淫。自與鶴猿伍。惟耽山水音。來尋迷隱處。滿地白雲深。

聖廟釋奠代作明治戊辰後釋奠久廢。今者有志之徒。復舉行之。

巍巍聖德久逾隆。釋奠如今復舊風。終古格天光表業。唐虞爭得競其功。

夏菊次韻迪齋

奇葩一種先秋芳。主領東籬夏景長。爛石流金呈秀色。攢星疊玉發鮮光。曾從白帝持清節。故向炎皇逞異香。好伴北窓高臥處。賞心不必屬重陽。

書憤有廢假字五十音用羅馬字之說

不知國體尊。惡辨五音正。大息彼青盲。濫持文部柄。

次韻迪齋時事有感

世體陵夷幾變更。謾稱天下益文明。無藝稅租經會議。趨時瓦釜作雷鳴。元勳終構參商隙。各黨猶爲蚌鷸爭。朝野競奔唯徇己。誰能爲國竭衷誠。

謾言十首節四

浮屠說法盡方便。要使俗流無悔愆。地獄天堂君解否。不存死後在生前。稱貸慈容如釋迦。責償怒氣似閻羅。子錢殆與母錢等。畜怨多於積貨多。不管人呼賤丈夫。包羞貪利甚於勾。君看造字鬼猶驚。卽執兩戈爭一貝。仁者以財能發身。未聞民富國仍貧。重租薄海無遺利。弊害生於聚歛臣。

信筆雜書事無次序。然平生行爲。可概見耳。二十首節十三

扈從公駕出霞城。萬死何圖得一生。生死由來皆有命。老年無事樂昇平。年來略解養生方。飲食游居概有常。四體順和無疾病。遐齡矍鑠得天強。齒落禪然新種之。猶餘故習剃霜髭。有人譽我減年數。其實衰頹亦可知。世上皆云錢有神。書耘日耨計長貧。青蚨到眼忽然去。不戀郊寒島瘦人。顧余短視乃天資。目力老來猶不衰。細字未須雙鸚鵡。光常內歛故如茲。自奉未曾輕費錢。少而惜福老猶然。人疑若有資財者。澣濯衣巾整且鮮。竹馬泥龍興也新。戲娛時與稚孫親。齡雖踰老童心有。不似顏衰齒豁人。明月清風誰是友。取之無禁爲吾有。不到朱門歌舞筵。偏親物外幽居叟。性癖將人意嚮差。酷憐松竹與梅花。子猷和靖陶彭澤。合併三家作一家。食性嘗將時俗違。蔬羹豆飯體猶肥。老妻不肯嗜羶肉。牛膾豚膈登膳稀。酒期於醉々停盃。五斗解醒何拙哉。善飲世間無我若。三蕉已過玉山頽。遠膝穉孫啼笑數。弄璋弄瓦六羈角。平頒菓餅偶參差。共向老翁爲計較。從吾所好送居諸。幼嗜吟哦老未除。得意自誇唯一事。雕蟲末技九千餘。

戊申九月鶴駕行啓奧羽地方恭作巴調六韻

重輪出鶴禁。率土洊雷聲。暫以問安暇。言爲見學行。山靈護金輅。風伯導鸞旌。普照前星耀。澄涵少海平。謳歌頌乾象。舞蹈仰離明。惠化宣遙邇。翹瞻萬國楨。

秋日雜書十二首節三

驅人日馭去匆匆。又見秋霜入鬢蓬。斷續機聲蟲織夜。依稀篆勢雁書空。感時彌嘆故交少。好古不言吾道窮。這裡自存真樂地。一床竹素與蟬紅。好遊少壯出鄉頻。歸老方尋物外因。白日胸堂存夜氣。高秋眉宇占吾春。窮搜河嶽三千里。穩寄雲林七十身。莫謂東仙分薄。東仙本是喫烟人。虛堂坐臥意融々。灑氣澄鮮天宇空。既雨桂花含淡白。未霜楓葉帶微紅。深居有似安巢鳥。奇癖兼之愛墨蟲。老入名淵真誤計。會心全在硯池中。

十月十五日木野崎東洲契家族徙東京二首節一

憶往思來倍黯然。禽魚惜別亦纏綿。花晨月夕歡殊減。無復孫兒侍飲筵。幽居以采菊東籬下爲韻五首節二

蓬戶若華堂。蔬殮均美肉。從來誇素封。遠宅松兼菊。日涉園成趣。栽培各順時。移蘭數澆水。護菊自編籬。

山茶花次韻

鶴頂檀心格本奇。侵凌霜雪現芳姿。菊花既盡梅花未。粧飾吟床賴有之。幽居再以采菊東籬下爲韻五首次迪齋元押節二

龜陰有薄田。得保自耕祿。秋確搗稌秔。晚厨供杞菊。總角事雕蟲。白頭均毀瓦。堪笑只心勞。考功當下夕。

矚目

山瘦霧消秋已闌。無邊風物轉荒寒。寒鴉古木日之夕。總作殘縑破墨看。冬夜爐邊小飲

冬夜讀書

老來宵永睡難成。獨坐咿唔添課程。千古廢興歸隻眼。幾編舒卷逼三更。爐培炭火床敷暖。燈注膏油几席明。觀到蔡城擒虜處。風吹急雪紙窓鳴。

馬上看梅

開遍早梅南北枝。阿隈川上雪晴時。蹇驢似解吟翁意。委轡垂鞭行自遲。

戊申歲晚二首

袞々流光轉瞬中。梅花已見領春風。升沈前定愁無益。毀譽兼忘酒有功。  
炊爨尙勤貧翟氏。去留曾任老陶翁。窮陰不肯嘆遲暮。卒歲室家和氣融。  
博山香燼尙餘清。燈火相親太有情。一榻圖書年跌宕。孤窓風雪夜縱橫。  
詩雖苦思功難進。心慣單貧累轉輕。老後無如睡眠少。竹爐添炭試茶鐺。

東仙詩鈔三編卷一終

東仙詩鈔三編卷二

岩代 二本松

竹內貞誠甫著  
松治鈔錄

○明治四十二年巳酉

巳酉歲日

鷄鳴與櫛着衣巾。笑我依然面目陳。鶴髮三千丈餘雪。馬齡七十二回春。  
百年幸值開明運。一飽長爲遺逸民。赤子之心猶不失。嬉遊也與歲華新。

春初雜咏八首節三

昨雨殘寒頓減威。今朝喜色動書幃。鳧浮沼上斷冰陷。雀鬧檐端餘雪飛。  
有命何須嗟暮齒。無心兼得避危機。遲他春服浴沂日。童冠提携風詠歸。  
自賦歸田廿歲餘。名心塵夢總消除。鬢將如鶴休看鏡。眼已生花尙翫書。  
數里江山人跡少。一簑烟雨俗情疎。隱棲不道無同志。時又論交到釣漁。  
凭梧澹坐欲眠遲。一點疎燈耿敝帷。夜靜香山橫細霧。寒生硯海結微澌。  
窮交嘗與青趺濶。結習惟當白蠹知。富者憂多貧者易。書痴畢竟勝錢痴。

卽事

貧厨無下物。且舉煖寒杯。郵丁敲戶至。京友寄濡苔。

與某村翁

懷葛之民殆庶幾。八旬彌健世間稀。酒於老後反增量。帶比壯時無減圍。篝火照波叉夜鯉。角弓衝雪弋春鵞。羨翁福履長如許。兒輩服田家亦肥。

爛柯圖

逢著山中對奕翁。山中日月太匆匆。傍觀不覺斧柯爛。一局贏輸猶未終。

浴沂圖

春服既成和景長。冠童相伴去徜徉。太平氣象須看取。世喚爲狂豈是狂。

讀劍南集有七十二歲吟予亦七十二因次其韻

五十懸車踰古稀。頑強視聽未全衰。追懷舊友概長夜。何幸老軀如少時。守樸任他當世笑。處閒不抱此心悲。現身粗悟安心法。一卷楞伽卽我師。

贈隱者某

不擇山林與市廛。高人心跡本超然。世間富貴草頭露。眼底榮華風際烟。

萬鎰難求閒日月。終生聊託好林泉。寬懷隨處皆仙境。莫道蓬萊別有天。

過岩井田昨非墓々在台運寺

濟世異才會憶君。今來掃藪見碑文。子孫零落去何處。蔓草荒涼埋古墳。兵火燒亡新著書。佐藩治績竟何如。椒漿今日無人奠。月冷風悲恨有餘。

月冷風悲。用碑銘詞。○昨非所著有論語途說。驛燈隨筆。松島紀行。藏岳餘稿等。

梅花余愛林逋雪後園林纔半樹水邊籬落忽橫枝之句因次其韻

粲然含笑雪霜時。欲貌丰姿上小詩。夜月影涵清淺水。春風香動最高枝。群芳畢竟難爲伍。造物從來似有私。寄語騷人偏愛惜。休拈玉笛等閒吹。

重三遊別墅次迪齋韻

雨晴修禊日。勝境會同人。蘭竹將無地。禽魚自作鄰。園池清以曠。亭宇樸而淳。不忘知音貴。休言好事貧。風襟俱磊々。燕坐正申々。分韻催詩戰。拈花記飲巡。流觴芳醞美。落筆藻詞新。相與極遊騁。逢斯得意春。

憶昨行

憶昨結交盡英髦。聞健相逢意氣豪。日費黃金買歌笑。花時月夕樂且敖。

紅袖勸酒清唱發。深盃亦不辭百罰。醉勞生綃寫新詞。墨滓亂灑污羅衣。  
 共道百年如一日。詩酒徵逐無相違。豪遊回首今幾載。諸子屈指幾人在。  
 文采風流空已矣。俯仰之間事々改。黃梁一炊歲月奔。傷心只有歌詞存。  
 華表不返令威鶴。楚澤難招宋玉魂。世人直爲物逆旅。爲歡無幾終黃土。  
 古往今來總如此。富貴功名不足數。造物於人若爲情。日告死喪使人驚。  
 欲使人知生有涯。及時爲樂慰一生。我今風情未消除。漸覺豪強與少殊。  
 歡飲只當開笑口。局促無爲嗟白首。古云人生行樂耳。萬事應付一杯酒。

道院梅十梅之一

貌古神清道院梅。一枝々傍醮壇開。辟穀蕭然烟火絕。嗅香還當點心來。

山舍梅十梅之二

瀟洒仙姿山舍梅。侵凌積雪與誰開。白首吟翁幽賞外。月明夜々鶴歸來。

春樵

伐木丁々山自幽。燒痕經雨綠差稠。歸來夜食添新味。采々春薇插擔頭。

黑塚春日

江上岩峯依舊青。鬼婆遺跡歲年經。孤墳春雨老杉暗。土俗云。鬼婆埋骨處。有老杉。巨窟

陰風荒蕪腥。鬼婆所住處。地闊桑麻連野綠。村間雞犬隔籬聽。遊人幾隊公園裡

柳醉花歌晚尙停。岩峯開公園。多植花木。

開成山觀櫻花

酒標茶望受風斜。窄袖長釵笑語譁。漾々春波如濯錦。環池無樹不櫻花。

酒瓢歌贈三浦霞城

吾友霞城風騷伯。嗜酒特有愛瓢癖。苟遇其尤價不論。其喜過於獲趙璧。  
 摩挲拂拭手不停。奇狀一々不可名。床上壁頭懸累々。物聚所好正爾馨。  
 手携腰挂兩得便。時赴風流文墨宴。金樽玉壘忽無色。滿堂看者皆嘆羨。  
 自云瓢兮予愛爾。爾能容酒與予似。雪月花時必相從。世人呼做一瓢子。  
 君不見豐公爲馬標。敵人一見氣先消。每得一捷添一枚。名重四方稱千  
 瓢。豐公之瓢費雕鐫。霞城之瓢是天然。天造難得人造易。一十可以當百  
 千。少陵匏尊今安在。次山石臼不可逮。二老若見應嗟稱。宜矣寶持入骨  
 愛。嗚呼豐公霞城用雖異。愛之之篤難軒輊。福島酒瓢品評會。瓢兮儼然

東坡詩集卷之二  
立赤幟。每會會員瞠乎後。一捷輒添一枚否。不言翫物喪其志。好事相傳長弗朽。儻有喁然五石瓠。割愛許否遺老夫。老夫於世亦無用。跨之汗漫浮江湖。

春雨次迪齋韻

連朝細雨落花多。蝶怨鶯愁也奈何。只有漁翁偏得意。半篙桃浪釣魚歌。

暮春雜書十首節六

地劣數弓筰作籬。霞城東畔小樓遲。烟深麥隴雉呼婦。水暖藻池魚孕兒。日永琴書供枕藉。老餘形態益支離。午眠醒處提烏觥。菊擇良苗換土移。結構何曾求奐輪。園亭修治自無塵。不須箕穎追巢許。且與龜魚作主人。風欄壯綠勾添夏。雨砌殘紅屏當春。閒酌閒吟機事絕。養雛乳燕亦能馴。老大幸爲遺逸民。般々勝事與時新。清狂恰遇風零候。雅咏方過禊飲辰。登山又買謝公屐。漉酒自裁陶令巾。不暖不寒天氣好。廢來書課出門頻。無拘無束送居諸。匹似閒雲自卷舒。老懶門生多削跡。新榮鄉友不通書。曲肱悠颺莊生蝶。撫檻浮沈惠子魚。春至春歸渾委順。幽懷要是得常據。

初試袷衣將體宜。惠風和暢自南吹。花空痴蝶近香岫。露嘆渴蜂窺硯池。去草鋤治栽藥圃。疏泉修補養魚陂。移床箕踞息疲倦。小鼎親煎新茗旗。綠樹重陰雨後新。年光瞥眼似奔輪。吟餘花鳥都如夢。醉裡襟懷別有春。寂寞園林堪寄跡。崎嶇檻阱早抽身。一杯餞送東君駕。又約明年來駐輪。

哭南摩羽峯四月十三日二首

昨夜星光隱海隅。彼蒼不憖遺耆儒。千秋學術追洙泗。一代文詞比歐蘇。化鶴何心蹤已遠。啼鶻有怨淚空枯。育才弘道平生志。門下士能紹述無。去歲盍簪同酌酬。今春何計隔明幽。倦游定厭黃塵界。作記應徵白玉樓。握手對床空昨夢。落花逝水倍新愁。臨風哀慟寢門外。欲寫銘詩祇涕流。

暮春書懷

不須料理白頭人。物外風情澹以親。一覺烟花繁麗夢。老年春異少年春。

聞杜鵑

自緣聽者異。何必不平鳴。先喜歌人耳。殊驚旅客情。巴山新樹暗。蜀道落花輕。稚子來相告。雲間月有聲。



新樹次韻

回首芳春幾許時。冥々樹色雨如絲。不堪綠葉成陰感。薄倖依然老牧之。

某園觀牡丹

富貴家開富貴花。天香國色玉無瑕。栽培一百有餘種。富貴花歸富貴家。

初夏卽事

杜宇一聲驚醉魂。簾前細雨也黃昏。春衣闌淡且休浣。剩得花香與酒痕。

老健次韻迪齋

頑強加二古稀年。止足何求蹄躑千。往事茫茫如異世。流光鼎鼎任奔川。

鋤瓜自灌邵平圃。種木時耘陶令田。詩力今猶不衰退。閒吟偶詠日成篇。

養鯉魚

頭角嶄然無等倫。凡魚遊泳暫爲隣。長成直上龍門去。休笑窮途失浪人。

夏日幽居作四聲詩寄霞城

龜陰林塘幽。曾無滌畦聲。薰風榴花開。晨晴槐陰清。初嘗新芽茶。還敲閒碁枰。青山當階前。支頤看雲生。

携鋤治荒園。處靜免咎毀。移松搖雲根。養鯉引野水。看山時褰簾。撫景轉  
隱几。無端催燒書。舉罈酒重醜。

端居逃塵羈。自量過素分。焚香消閒思。見畫愛雅韻。逍遙堪終年。去就遂  
任運。安哉無何鄉。貴賤詎要問。

才迂遭人嗤。却得脫物役。林深無塵痕。宅僻削俗迹。因爲幽懷詩。忽憶積  
學客。如能蒙賡酬。若獲白璧百。

夏日遊山寺次韻迪齋

市朝厄欲暴。汗雨滴衣船。步出有爲界。來登無量天。暑於初地退。客借上  
方眠。終日脫煩熱。心身俱寂然。

何處堪消暑

何處堪消暑。松間高枕眠。鶴聲驚冷夢。白日意將仙。

夏盡次韻迪齋

金風蕭颯夏云徂。一葉先驚井上梧。暑退宛如離火宅。涼生頓似住冰壺。  
露冷將收青笛簟。蚊空初撤碧紗幮。觀書行藥渾相好。老體迎秋氣漸蘇。

送人避暑浴溫泉

暑濕如遭甌底蒸。名山羨汝試吟登。靈泉聞道能治病。只恐烟霞疾却增。  
七月念六日。松治挈妻子歸省。留一月。特令妻子侍養。又赴東京。  
幾年歸養志。今慰倚門思。膝下斑衣戲。堂前弄鳥嬉。含飴堪送老。佐餼不  
憂飢。捧檄留妻子。兼供菽水資。

雷雨

望裏奇峯壞。奔雷霹靂頻。傾河何等力。失箸是誰人。特地炎威挫。無端霽  
色新。物我皆蘇醒。沛然膏澤勻。

哭岡迪齋名貞智九月二十三日

仙遊乘鶴去何之。六十餘年舊已知。今日寢門空哭慟。明春輦轂負邀期。  
迪齋來書曰。明春還東京。故預約再會。寄聲從是長難得。造物奚爲不憇遺。攬涕強將理殘稿。豈  
堪重看唱酬詩。

閒中頗自適戲詠五首節三

早避飛僧與巧丸。鷓巢占得一枝安。下將關牡逢迎懶。除去牀屏坐臥寬。

既雨池菱催萼紫。未霜園柿帶微丹。隨時撫景惟當佚。老大誰云每鮮歡。  
七十二齡垂白翁。守持清儉舊家風。薄酸市酒醉堪致。麤糲儒餐飢充。  
睡起茶聲醒耳孔。讀餘書味在胸中。雖無錦綺膏粱美。一飽怡々已過豐。  
竹樹扶疎作四隣。蕭然白日自無塵。蟬痴螳黠竟誰是。櫟散樗全宜自珍。  
蓬室可居何足陋。藜羹有糝未爲貧。山川肅殺逢黃落。歡伯能令秋氣春。

秋懷五首節三

白首蹉跎潦倒翁。讀書擊劍兩無功。可憐少壯經時志。盡付秋風暮雨中。  
淒涼秋氣感人思。搖落誰憐宋玉悲。詞賦雖工無所用。苦心唯有筆奴知。  
自覺形衰氣力微。少年心事總相違。悵然不耐徂秋感。眼著玄花帶減圍。

秋晴步到川崎村書矚目二首

古藤柱杖代提携。步自岡東到瀨西。蓼紅蘆白蛇行水。黃樹晴雲斗折蹊。  
老去逾知田舍好。年來頗厭世途迷。時平無復追胥跡。賽社人皆醉若泥。  
霜稀天氣尚柔嘉。出郭偏憐人事賒。溪極纔通橋獨木。林開忽遇徑三叉。  
雲黃架上懸禾處。雪白檐前晒紙家。落々豐穰須看取。笑歌聲裡響連枷。

案山子次韻

破笠敗蓑田圃間。引而不發竹弓彎。毆將烏雀護梁稻。呼做案山非案山。

秋海棠次霞城韻

一種斷腸誰不憐。幽姿淒婉弄秋妍。依稀纔剩春風面。應是花中再謫仙。

懷舊友

同醉佳人錦瑟傍。豪遊回首夢茫茫。秋風一夜孤燈下。淚濺行間讀舊章。

聞雁次某韻

宿志龍鍾歲不停。江湖顧我久伶仃。烟波影白月光冷。今夜新鴻可耐聽。

九月十三夜寄某少將

白露爲霜月色鮮。賞觀不得共詩筵。時清無復風魚警。雅咏應賡越將篇。

十月十七日遊兒臺安部井梅叟及童男女六人同行

老態依然點也狂。冠童六七共徜徉。風流不讓舞雩興。沐浴山光與水光。

薩摩芋

甌中黃玉熟。釜上白雲揚。無核脆而美。去皮鬆且香。何須加醬腊。亦可匹。

硬梁。其價甚低賤。堪充貧士腸。

負暄

晴暉煦々氣排冬。閉目南榮春滿胸。寵辱兩忘無雜念。櫛梳相廢任踈慵。閒情淡似雲情淡。睡味濃於酒味濃。不覺老妻添熟被。黑甜直到日高春。

開爐

斗室盎然溫透肌。冰霜不到自熙々。心和終日擁無厭。夢穩每晨興較遲。

騷侶分題挑白戰。茶僧折柬約幽期。此般韻事疾相應。樵叟求詩代炭資。

已酉歲晚二首

老境無營又歲陰。詩鬚剩見曉霜侵。盈甌土茗泥床暖。一盞書燈雪屋深。暮齒悔曾迷世路。餘年幸得臥山林。平生雜好渾拋却。拋却不能惟苦吟。數歷人間幾盛衰。衰殘聊寄淡生涯。誰憐寒菊傲霜色。自撫孤松侵雪姿。奔走邦家崩拆際。戊辰之難逢遭海宇輯寧期。明治維新少勞博得老餘逸。造物乘除本有時。

○明治四十三年庚戌

庚戌歲朝二首

松筠初日瑞光涵。斗位回寅皇澤覃。皞々民心蒙聖化。泚々物象作春酣。  
厨藏京醞瓷初啓。窖養盆梅蕊半含。稱壽屠蘇還到手。馬齡七十又加三。  
一兩朝來洗舊塵。民瞻總與歲華新。官家初削大陰曆。率土之濱無不春。

一月九日松洲丹羽公令子降誕賦此奉賀

吉夢維熊天降祥。端容溫秀素鸞行。公家福祉長無艾。二弄瓦來今弄璋。  
余老來好釣獲固可不獲亦可蓋意不專在魚也

處世應須有託逃。青蓑白笠好游敖。一竿風月無他念。數里江山屬我曹。  
人爵爭如天爵貴。雲臺不及釣臺高。讀書之暇齋糧出手挈。箬笠泛小舸。

春初簡出縱筆雜書二十首 節四

傳家舊物一氈青。素業無成徒馬齡。二首六身誇爽健。三孫四子共康寧。  
松經臘雪益添色。梅得春風初吐馨。弄鳥含飴貧亦樂。況於閒處免勞形。  
優游足以送餘生。賴有光疇雇客耕。一飽卽知吾事了。踈慵彌與世緣輕。  
旋磨勝肉玉延汁。熟煮如酥骨董羹。畢竟家風安儉素。庖珍何必五侯鯖。

一幅頭巾一領衣。茗爐終日獨依々。樂飢何計食多少。屏跡肯關人是非。  
雖則設門々不鎖。無嘗謝客々常稀。自思止足身安妥。遂不爲觀聽所譏。  
老來光景太駸々。閱盡盛衰追感深。憶着壯遊如幻夢。述將往事上孤吟。  
晚歲雖然齊物我。故交空復嘆人琴。卽今詩社飄零久。誰繼當年伐木音。

獨酌

鶯黃澈灩甕頭春。自獻自酬風味新。未嘗痛飲濡其首。只要微醺養我神。  
美矣三蕉忘物累。陶然一醉散情塵。先生燕喜豈無伴。不是賢人卽聖人。

次耻堂探梅韻

荒尋閒曳一藤筇。要見春風冰雪容。獨鶴導來溪上路。夕陽聽斷水西鐘。  
清標卓越如高士。老骨嶒稜似臥龍。幽處不須嘆寂寞。歲寒相伴有孤松。

自嘲

老來土木委形骸。不問無涯兼有涯。古拙嘗遭時俗笑。自痴猶與末流乖。  
人間勢利蕉藏鹿。眼底年華蟻夢槐。久矣塵心渾抖擻。依然暖熟只茅柴。

春漁次韻耻堂

鳴綠溶々宿雨乾。鮮鱗潑刺上長竿。桃花浪漲醉蓑濕。柳絮風生吟笠寒。不知處世行途險。孰與浮家泛宅安。釣罷黃昏還換酒。曾無外累犯心官。

春游次韻恥堂

風情未減鬢毛斑。得々乘晴挈小蠻。相與看花春醉去。不妨蹈月夜歌還。暮鐘緩度烟中寺。殘照猶明雁外山。貪景遲留非獨我。彈絲聲在翠微間。

春日書感

杜門淑節看空過。奈此胸襟豈鬱何。避獺涸潭魚聚藻。傍人朱閣燕營窠。濟時不問謀當否。決議惟憑黨寡多。只有漁翁無係累。春風一棹白鷗波。

縱川堂近稿題詞

我客神戶日。傾蓋初逢君。詩篇與酬和。交情日相親。君詩誰可敵。君才固不群。不止避三舍。筆硯將欲焚。一朝忽分袂。參商三十春。寤寐忘不得。追思情殷々。今茲寄近稿。驚喜拍案頻。古體何雄偉。近體皆清新。碧海誅巨鯨。華嶽生春雲。變化難窺測。往々驚鬼神。比諸曩時作。復如出別人。要之老鍊力。學亦博而勤。方今斯道弊。橫流失其津。明清奉爲師。唐宋斥爲陳。

蕭艾其如蘭。孰辨蕪與薰。魚目以爲珠。不知僞與真。我老退山野。燕石自愛珍。君今住東京。荆砥無緇磷。鄙見舉大綱。瑣細豈云々。洞察今與古。大雅可扶輪。

賀高橋遂堂金婚式

同庖五十年。健乾而柔坤。畫眉與舉案。恭敬而和溫。今夕金婚式。卿々福壽繁。福壽當前期。金剛石之婚。

櫻花次韻耻堂詩

郁々丰姿美莫加。不呼姓字只稱花。晨曦照映溫如玉。夜月交輝淡似霞。一目千株芳野嶺。三旬永壽納言家。賞心無奈春光短。水自東流日易斜。

蝶

綠醉紅眠儘自由。忘形栩栩々不知愁。偷香花際露鬚濕。傳粉草頭烟翅柔。獨占三春清富貴。誰如一世最風流。憐渠抵死無拘束。知己千年只有周。即景次恥堂韻

漁莊蟹舍隔塵凡。卜地斯間著隱銜。草滿窓前曾不掃。門臨水際鎖無緘。

烟籠柳影遮簾額。風引鷗聲落枕函。江北江南渾若畫。一竿斜日送歸帆。  
宴友人宅此日櫻花滿開分字得氤

花香與酒共氛氤。節近重三春十分。捫舌黃鶯驚艷曲。收翎粉蝶避紅裙。  
三蕉徑醉誰如我。八韻先成獨有君。此日盛筵天氣好。微風不動護芳雲。

山川錦楓六十歲壽詞好事近

芳辰和氣融。鶯歌蝶舞覽揆。初度華宴春好。列綵衣珠履。稱觴流霞滿  
滿斟。先祝重甲子。甲子周而復始。從今日數起。

浸穀

貯水修渠堰。土膏方普施。粒肥生意王。甲拆發芽滋。沈種無違候。盈箱可  
預期。春耕從是始。脯酒賽叢祠。

老艦次韻恥堂結句枯野故事

當年清露役。海上泰山安。數奏我軍捷。長令胡膽寒。堅牢經百戰。老朽等  
閒官。何以傳名蹟。應爲琴瑟看。

睡起偶書

一庭花草弄春柔。睡起親煎茶半甌。不分新來雙燕子。關人何事話閒愁。

獨酌次韻耻堂

何緣娛老境。有酒慰吟勞。自得閒中趣。還非少日豪。微醺春盎々。小飲意  
陶々。不効醉鄉輩。昏迷此裡逃。

勿來關圖分字得誇

英姿何綽々。詞藻吐天葩。異日認飛雁。今時看落花。旌旗森不動。士馬肅  
無譁。關門荒廢久。後世作圖誇。

小警墓分字得傍

一抔埋玉骨。淑節永傳芳。相國發嗔怒。椒房承寵光。松籟留琴韻。林花認  
寶粧。嵯峨深夜月。偏照古墳傍。

盆池限韻

埋盆規作沼。清淺鏡光青。拳石表嵩嶽。勺泉開洞庭。隨風花是帆。逐浪芥  
爲舡。占地方三尺。唯容數點星。

退筆分字得鬢

文陣策勳罷。年深弗中繩。扶持心已盡。任使力難勝。居管乞終老。免冠慚不能。雖然甘引退。黑髮尚鬢髻。

耻堂寄五古一篇。且云春初東仙促唱和。課題自東至咸。五七言律各三十首。至春暮而畢。蓋其涉日七旬強。因次其韻以答。

七旬六十篇。課終攔不律。喜如農有年。公逋私債畢。又如巴厘調。謬和清廟瑟。瑣細雕蟲技。縱橫扛鼎筆。顧君本性情。清嚴而麗密。凜々刀發硎。整整髮就櫛。顧我乖時尙。動輒見嘲叱。惟君不遐棄。以爲吾儔匹。誰持大雅風。以匡今世失。工拙雖不同。所趨其揆一。

暮春雜書老農云西嶽殘雪多則不霜

箔上蠶生風日和。八十八夜已經過。判知桑葉無霜害。西嶽崢嶸殘雪多。

觀碁

踈簾清簟俗塵無。聊以忘憂橘裏娛。盛世不知兵革事。翻於局上看孫吳。

題便面

湖光如鏡碧迢々。水閣殘烟澹不消。萬里青冥風露冷。玉人乘鶴夜吹蕭。

詠史應索二首

海宇初逢歛戰塵。功名何必畫麒麟。早收斬將擎旗手。便作眠雲嘯月身。晚節猶留三尺劍。高情聊寄一枝春。元和錫壤剖符輩。爭及詩仙堂上人。篤學修身夙所欽。溫乎德望服人深。奉親最切老萊志。希聖閒怡尼父心。邑宰揣知囚枉繫。馬丁還致客遺金。里民敬慕長無已。每過墳前必正襟。

夏日偶書耻堂以薰風自南來爲韻見似因步其元押

淨掃黃藤榻。徐鋪白簟紋。自憐涼似洗。不覺暑如焚。碧藕遞幽馥。新篁分翠芬。池清通淺水。樹密養閒雲。墜露多時濕。鳴蜩盡日聞。此中無個事。澹坐對爐薰。

渝盟天討罪。水陸並前攻。諸將膽如斗。三軍氣貫虹。奉天收壘壁。立海碎艨艟。一舉膺懲典。長成戡定功。復開神后府。神功皇后。置日本府于任那。以統制三韓。○置統監府。更表

漢時銅。定樺太境界。偃武修文德。巍々皇祖風。耻堂叙廣瀨中佐銅像之事。盡矣。子故述征露之事。

却掃度三庚。虛堂清夏意。泉聲和冷吟。茗氣醒閒醉。寵辱不關身。塵埃長掉臂。慵裁求米書。學寫換鶯字。若悟去來緣。不爭朝夕利。區々何足言。有

自與無自。

松下讀書庵。略同彌勒龕。豈爲三窟鑿。誰解六塵貪。心是忘形蝶。身如作繭蠶。霞浮新煮酒。霜破久藏柑。涼飲還聊設。閒吟祇自耽。平生憐斥鷃。不敢望圖南。

已過斷梅候。納涼謀又催。泉從南澗引。竹向北窓栽。天保莊椿壽。誰云歛硯災。香山生細靄。茗海起輕雷。聊置白雲榻。如登寒露臺。炎官兼熱吏。曾不入門來。

雜書

達者與天徒。豈甘黃綬屈。可看溟海禽。不是樊籠物。

走馬燈 課題限韻

鸞輪巧駕彩燈檠。旋轉不停憑火精。飛騰逐電忽無影。躡蹠追風如有聲。露艦燒殘玄海役。皇威震耀奉天兵。世間幾許驚駘輩。欲與驥騏爭遠程。

小景

落日在篷窻。老漁收釣去。浦口暮潮生。鷗鳴不知處。

八月十一日大雨數日。河水暴漲。東京靜岡埼玉茨城千葉群馬長

野山梨新潟宮城福島諸縣。水害頗多。十絕節二

季夏晴天少。初秋大雨霖。諸州罹水患。豐歉又關心。

何時后土乾。衆志抱悵々。安倩女媧手。排雲補漏天。

韓國合併

明治四十三。九月二十二。李趙承主命。敷陳讓邦事。統監寺內氏。傳奏乞上意。越八日下詔。合併乃宣示。徵之于古今。聊述其所自。天造草昧時。開國非異類。素尊親經營。神后置府吏。朝貢稱外藩。永世誓無貳。一朝皇綱弛。叛去矜以肆。弘安寇西陲。先導胡元帥。豐公問罪師。半途不達志。訖德川氏時。禮聘使數至。王政復往古。待以隣交誼。扶植國獨立。蔑恩反忌恣。朝清而夕露。動輒爲我累。清露媾和成。遂爲保護地。捨存而徵亡。授旨發密使。哀訴海牙會。非望不能遂。陰謀忽暴露。內懼自取戾。而今納版圖。長依我麻庇。我皇深嘉之。優容可其議。乃與民更始。除弊而興利。改韓爲朝



鮮封册授王位。釐革舊官政。總督府設置。大赦減免租。撫卹多賚賜。感泣天恩渥。沛如時雨施。本支復舊基。車書歸同治。天功光祖宗。帝業裕後嗣。嗚呼休矣哉。聖德之所致。昭々億萬年。天壤長不墜。

八月十七日史談會爲朝鮮問題殉難志士追念會

韓納版圖歸聖廷。奠將蘋藻告群靈。始知功績在身後。今日泉臺目可瞑。

贈小林石庵善畫兼好詩

到處江山寫取真。善遊美汝自由身。無聲詩與有聲畫。二美兼之今幾人。

中秋烏谷南樓賞月分得尤二首節一

白露將霜灑氣稠。衆星盡沒鏡光浮。今夕恰逢新快霽。十年無此好中秋。老來不趨笙歌會。物外共爲詩酒遊。撒去蠟燈明似晝。淋漓醉墨舞蛟蚪。

賀恥堂卜新居於芝伊皿子恥堂向住本所。罹水患。故有轉句。

卜地經營亟。依山結構新。超然高且爽。美矣奐而輪。烟靄濃圍屋。松筠鬱作隣。不惟無水患。自遠市閭塵。

咏史三首

外示勤忠內異圖。豐家諸將望扶孤。真情微露盟書日。枉道衰翁血已枯。玉帛朝天奉聖明。郊迎屈已結歡情。會同侯伯不離畔。忠實始終能守成。諸侯譜第待何殊。憑藉積威成舊圖。更使親王守私廟。不知廟鬼饗之無。

幽居自詠

亭前峯巒列。屋後竹樹深。懶雲不出岫。倦鳥已歸林。自有山林趣。而無車馬尋。坐臥朝又暮。怡然愜素襟。苟適吾所願。何必棲雲岑。不追巢許迹。惟懷巢許心。

咏史五首節三

身居重鎮撫東陲。難信櫻花絕命詞。鳩殺因讒言亦妄。豐公問病遣官醫。晚好魯論恒自勤。但由私怨應東軍。可憐忠實知機暗。欲使身翁扶幼君。扶危繼絕問惺窩。惟武惟文兩足多。若躡東軍西向後。東西勝負果如何。

偶述

案上書數帙。床前酒盈甌。讀書無常課。倦則束卷收。飲酒無常量。醉則覆杯休。聊消一日閒。且遣千古憂。書酒中有得。醉讀外何求。曾是無榮辱。豈

其有悔尤。百年如是過。身世兩悠悠。

菅野寅吉來宿

吾視汝猶子。汝呼吾作爺。共喫家常飯。同嘗自在茶。圍爐談不盡。繼燭意無涯。冬夜誰云永。窓前度曙鴉。

謾言

世喚爲狂而謂狂。紛々毀譽復何常。東家丘被鄉人笑。有友時來自遠方。

書懷

野性夙懷丘壑情。兒婚女嫁既圓成。名山在眼遊猶未。緬想當年尙子平。

庚戌歲晚二首

暑往寒來歲序更。雀羅門冷少逢迎。飽經險阻知安命。嘗盡辛酸悟養生。老婦衰翁居故土。一男三女在東京。人間離合應前定。兩處無虞心太平。從來雁木各難并。禍福茫茫未易評。書爲消閒無定課。詩惟遣興不求名。老將仙鶴匹如瘦。寒與野梅能樣清。冷澹生涯君勿笑。忘身何苦事營營。東仙詩鈔三編卷二終

東仙詩鈔三編卷三

岩代 二本松

竹內貞誠甫著  
男 松治鈔錄

○明治四十四年辛亥

新年口號

山川添氣色。霧々向新陽。昨日忘年會。今朝獻歲觴。義車何倏忽。人世亦繁忙。惟合爲歡樂。悠々任彼蒼。

一月八日陸奧原鼎厓見訪二首節一○鼎厓少赴支那。今任後志國壽郡。

綠酒紅燈又暫同。稜々意氣尙如虹。妙齡曾嘯南京月。長翮還搏北海風。奇服異言聞且駭。炎天朔地說無窮。相留清話委今夕。廿歲離愁一掃空。

春初幽居雜書

寒雲橫石徑。春雪掩柴扃。避凍梅花帳。遮風水墨屏。虛心蟬委蛻。穩夢蝶忘形。自寫還嬰字。聊爲座右銘。

飲罷閒敲句。句成還舉卮。餘生天尙活。此癖藥難醫。愛酒陶彭澤。能詩杜

東山詩鈔三編 卷三  
拾遺。雖非吾所望。夙好在于斯。

恥堂次韻春初雜書仍再疊韻

海內昇平久。時風幾變遷。農民多失產。將相各儲錢。貧豈羨金穴。渴何思盜泉。杞憂無所補。猶被物情牽。

風俗日彫敝。諸公皆苟安。民窮租稅重。賊忸政刑寬。縱是髮如雪。依然心尚丹。空懷憂世念。北闕邈難干。

皇謨誰協贊。議者悉韋柔。無奈李牛黨。難分涇渭流。奢風追日熾。弊事與年稠。只說春方好。共爲花柳遊。

老軀差快適。小院稍暄妍。靜裡年華改。吟邊物象遷。晨襟春盎々。午枕蝶仙々。暫離深爐火。悠然到暮天。

一月念四日書憤此日幸德某等死刑

苟有罔君志。人神共所攻。不啻知國體。只是信蠻風。古來無此賊。今後奈群蒙。三相承優詔。要令名教隆。三相總理內務文部

耕歸

春疇耕漸了。墟落起炊烟。老馬知歸路。不須繩轡牽。

安部并梅叟八十壽詞

歲寒心事獨梅知。老健翻勝少壯時。議院曾陳經濟策。隱居猶賦感懷詩。高風不羨乘軒鶴。素志惟傾向日葵。海屋八籌稱壽早。應須稱壽待期頤。

忠雄入中學書勗之

學問之道。孝悌爲基。學而時習。親友隆師。本立道生。聖賢如茲。汝入中學。汝其慎之。棄汝幼志。致汝良知。琢磨弗懈。夙夕於斯。學成身達。聞譽交施。書以勗之。服膺勿遺。

國定教科書中日本歷史紀南北朝事故有此作

天無二日。童子知之。博士學士。彼何人斯。口尚孔臭。得意揚眉。備任編纂。蠡測管窺。蚍蜉撼樹。燭火競輝。南北朝紀。杜撰是爲。立諸學校。以貳民思。後有亂臣。藉口于茲。當路摸稜。曲庇其非。其非益顯。雖悔可追。不火其書。責何得辭。正閔皇統。聖勅巍々。名正義明。奚復容疑。稽之往古。徵之今時。天祖垂統。神器所歸。日嗣無二。天壤無涯。今上賜德川光圀詔勅曰。正閔皇統云々。皇位繼承編。大政要紀。南朝爲正統。

李笠翁伊園十宜做其擊十首節二

閒澹秋光與境宜。絕無塵氣攪幽思。黃花紅葉般般好。併入香山彭澤詩。

右宜秋

點滴檐前耳孔清。老知佳麗是虛名。錦城歌吹徒喧聒。不及天然琴筑聲。

右宜雨

岡鹿門見寄近作仍次韻以酬三首節一

強攀高礎寄相思。往事回頭天一涯。京洛春風傾蓋處。霞城夜雨對床時。

送堀江九峯之朝鮮

素尊經始國。聖斷叶前謨。雨露舊民物。山河新版圖。瘴地寒暄異。遐陬土產殊。觀風應有得。行矣勿踟蹰。

燕間四適四首節二

不論曲操今古。休閒絲絃有無。炊爨餘材想邕。薰風解慍思虞。琴  
枯松流水塵遠。清簟疎簾夏涼。局裡乾坤寄跡。手談身世兼忘。菘

薛文清五友節二

淇澳歲寒姿。森々如碧玉。夷齊骨相清。一世無由俗。竹  
爲嫌塵垢污。深谷秘幽香。不逢君子佩。蕭艾伍何傷。蘭

送開南丸赴南極

雪海冰洋何渺茫。窮搜今見破天荒。鵬飛不至蛟龍避。任汝圖南萬里航。

杜居不出。偶有所感。託物述懷。五首節三

萬里冲霄志。孤高不染塵。一旦戀稻粱。爭食伍鷄群。縱乘大夫軒。孰與自由身。

又逢春社至。營巢來往頻。前時朱閣富。今者白屋貧。榮悴雖然異。不忘舊主人。

何必覓爲龍。在淵或在渚。浮沈意自如。江湖得吾處。聞說行雨苦。不上龍門去。

食菜四首節一

安居守分妄心息。菜食何曾殊肉食。願與衆人俱喜顏。屬厭斯味無斯色。

自題寫真

我本麋鹿性。自顧骨相屯。子姪苦勸我。機鏡寫吾真。齒落日視花。鬚髭半如銀。少壯貌猶醜。況又踰七旬。妍醜是天賦。萬事付前因。踈放而孤介。難與俗同塵。何必追箕穎。何必畫麒麟。住世仍忘世。幸作太平民。休問妍與醜。悠悠任運身。

雨竹圖

點滴無聲濕翠柯。不看窓紙影婆娑。斑々應是相思淚。偏傍娥皇廟裡多。讀耻堂詩因成十四韻以寄

又接東京信。開緘十數詩。長吟忘夜寢。細嚼止朝飢。盈耳新翻曲。驚心絕妙辭。字排珠鑿落。聲和玉參差。凌漢翔靈鳳。遊溟現碧螭。秋毫微不漏。霄壤大無遺。理合風還古。天教汝起衰。顧余才本劣。況老力逾疲。巧拙既相判。功夫詎可追。嘗懷千歲遇。幸護一朝知。針芥有冥契。驥駑難並馳。瑤華承辱贈。藥石得良規。每駭載賡速。深慚酬答遲。更因雙鯉便。感謝竭愚思。四月二日訪伊藤武壽寫真賦此以似

昔我四十二。

明治十六年

與子赴東京。子齡未弱冠。初爲萬里行。一日遊淺草。

共寫兩人形。爾來幾離合。視之慰生平。今我七十四。貌瘦霜鬚生。子齡既強仕。氣宇何崢嶸。命工又攝影。自喜且自驚。照之舊寫真。形容與歲更。二十九年來。不易一交情。

安達安積田村三郡物產品評會

卅四年辛亥。四月初五日。三郡品評會。開會式茲畢。選出諸土產。農工各爭術。穀果與械器。陳列難殫述。裝飾場內外。百事頗備悉。新設演技場。更築貴賓室。列幕張綺羅。綠門加丹漆。電燈粲如星。綵旗比似櫛。數開園游會。薦饋盡芬饌。貴賓陸續來。紅袖參差出。嬌喉歌聲凝。纖腰舞拍密。樂助餘興多。歡促群心逸。遠近人麀集。場內日闌溢。注目裝飾盛。物品誰評騭。時俗忸太平。浮躁而奢佚。籍口于發展。行爲則不壹。專爲外觀美。時風所牽率。浪費良不貲。就華而去實。得失不相償。本末兩相失。如何糜民財。虛飾文滅質。弊風生盛時。救之誰能必。聊欲供追覽。月日託詩筆。

暮春酌酒

東仙詩集三編 卷二  
百花雪浪藉。雙鬢霜爛斑。明年春又至。晚歲少不還。人生如幻泡。老少須  
臾間。春去何必恨。老至亦不歎。幸當頑健日。委順且成歡。成歡藉何物。美  
酒留紅顏。醉裡春長在。猶爲少年看。方知消愁藥。有勝却老丹。

夏景冲澹。以綠陰幽草勝花時爲韻七首。節二

榴花映日紅。槐葉含烟綠。晝永客來稀。閒眠方一局。  
遊魚吹落絮。倦蝶抱餘花。幽夢誰呼覺。山童午碾茶。

自述

一日又一日。不覺年齡暮。耳目漸聾盲。髮齒亦脫去。壯氣隨消磨。顏容不  
如故。人生覆載間。百年均電露。富貴人所好。貧賤人所惡。好惡豈異人。通  
塞自有數。所以任所遇。恬退安吾素。負郭田二頃。遠廬桑數圃。何必求  
輪蓬。室聊寄寓。何必慕甘肥。蔬餐可含哺。非富又非貧。略有衣食住。老少  
與彭殤。委諸天所賦。知止保餘生。日夕足歡趣。

讀東湖遺稿

每誦一篇嘆數回。屈平詞賦賈生才。雖然嘯月吟風什。總自滿腔忠慨來。

夏初卽事首尾之吟

新陰風日宜。也勝百花時。碧蘚連梧竹。自然無俗思。  
自然無俗思。小閣面清池。排藻魚携勝。離巢燕護兒。  
離巢燕護兒。柝簇繭抽絲。悠然觀物化。老嬾少營爲。  
老嬾少營爲。午眠初覺時。窓竹籠餘靄。茗炆猶未移。  
茗爐猶未移。且復算殘碁。意境殊佳適。新陰風日宜。

自詠

豐饒七旬翁。蕭條一畝宮。不違今世法。竊慕古人風。寄跡毀譽外。游心書  
畫中。此身無住著。約略與雲同。

題畫五首節二

殘陽半浦明。浦口小舟橫。罷釣漁翁去。蘋風魚狗聲。  
沙虛岸善崩。來往者漁老。蕭々蘆葦間。一條成白道。

悼松本市之丞七月九日

市之丞。少壯富傾里閭。晚年貧苦。勢利之徒削跡。每謂余爲知己。日與

君釣游局戲。八十爲期。今茲辛亥。年七十五。溘然長逝。不堪痛悼。結交何易。盛將衰。曾謂惟君作己知。晚歲清貧人不顧。壯時豪富衆皆推。春風暖舫俱垂釣。夜雪寒燈共鬪碁。從是同遊長已矣。空違八十以爲期。

幽居

池幽雙鷺下。樹密一蟬吟。蕭寂東仙宅。竟日無人尋。只對西山翠。爽氣盈中襟。

新秋雜書三首節一

涼入郊墟積雨晴。陳編又對短燈檠。西風池上殘荷氣。夕露叢間早蟋聲。俗愁渾共暑氛散。詩思偏和秋水清。有客問奇時載酒。深居愧不揜虛名。

烏谷中秋觀月宴

去年中秋。松本市之丞同此宴。

碧漢無聲輾玉輪。開襟對飲話前塵。月明不與去年異。只恨尊前欠一人。題釣臺圖

七里桐江眼界開。功名富貴等寒灰。達人無論高卑意。一視雲臺與釣臺。自覺

芳槿榮一朝。靈椿壽千年。蜉蝣不過夕。龜鶴不量年。豈止動植已。人生亦復然。遐齡榮啓期。短命顏子淵。修者不可減。短者不可延。同在覆載內。修短何相懸。願我何幸福。七十加四焉。齒髮雖衰弊。肢體猶頑堅。布裘與蔬食。聊且免飢寒。繩樞與甕牖。以避風雨干。衣食住粗足。此外無所關。所以修與短。委順心常安。借問是何人。龜陰老東仙。

讀開元天寶遺事

何料豬龍挾異圖。悅他獮子亂贏輸。大家親統風流陣。敵得漁陽鍊騎無。卽事

社近兒曹喜欲顛。六街鼓笛已喧闐。白頭多事老祠掌。雇客家々求祭錢。秋日憶東京諸兒二首節一

白露爲霜秋半過。浮雲落日杳關河。天寒北境雪將降。地暖東京菊未莎。蠶食鶉衣聊復爾。珠炊桂粟果如何。但令兩處俱無恙。日不相看安且和。新聞紙傳支那革命黨事十六首節五○黎元洪黃興爲革命黨首領。

陰風捲地暗烟塵。羽檄匆匆飛報頻。陳吳創事々成否。應有真人出代秦。

殺氣南來日色黃。君臣相顧共蒼惶。果然繫得民心否。憲法敷宣十九章。治國惟憑王霸才。綿々一系亦難哉。立爲天子元無種。已自唐虞禪讓來。勝敗到頭難測知。軍標白布撒龍旗。更令專使講和議。且緩鑿輿出狩期。若不匆々收戰局。恐他列國始偷營。聞道保全謀已決。使臣銜命赴燕京。

隱居

雲宿丘園寂々。苔封門巷深々。癖性惟耽野趣。安眠無夢華簪。對客樂然思寢。看山偶爾橫琴。隱居非事高尙。世上誰知此心。

贈梅叟余老來喜動。動故健。健故動。梅叟亦能爲行樂。

餘生落得自由身。我既七旬君八旬。有暇君能爲散藥。乘閒我亦理垂綸。茗椀同持明月夜。吟筇共曳百花春。老來謝絕人間事。不厭提携行樂頻。

革命黨

陸沈三百歲。革命果如何。欲營新社稷。以復舊山河。合黨誰持鉞。前徒孰倒戈。滿清方未造。能達宿圖麼。

偶咏座旁諸物十二首節二

守墨憑收潤筆錢。貧儒活計是良田。歲無豐歉官無稅。儘供書耘六十年。

右古硯

碧海何當誅老蚪。匣藏清世用無由。好剛素質誰相似。不趁時風曲作鈎。

右古刀

書事二首

歷世興亡豈有窮。嘗云聖主代天工。蒼黔一變衣冠俗。赤縣渾歸辮髮風。左衽終身心不忘。革軍今日勢何雄。曾來放伐尋常事。焉得金甌霄壤同。人心思漢豈今時。况又陵夷運運衰。父老百年看斷髮。官兵幾處豎降旗。州郭霜寒屯虎豹。城門月黑叫臬鷗。休論君立與民立。戰勝何須敢費辭。

述懷

小院楓已老。東籬菊又莎。榮悴何倏忽。秋光看又過。豈獨物如此。人生亦奈何。少壯能幾時。秋霜髮皤々。悵然惜暮景。難駐魯陽戈。不如委命去。得酒且酣歌。忘形老少外。一醉心常和。

冬夜聽雪偶憶墨水看梅



寒威漸々逼書帷。兀々老懷眠去遲。方此龜陰聽雪夜。憶曾墨水看梅時。追尋往跡均春夢。挑盡孤燈閱舊詩。欲話少游當日事。故交零落有誰知。

閒適

門低徑狹不容車。僻處偏將世事賒。檐下移來南燭子。瓶中聘得水仙花。明窓淨几書爲友。密帳溫爐懶作家。鎮日無人殊靜寂。睡餘時又閱南華。

梅花水仙合瓶

仙姿相並占春光。日伴詩翁爐坐傍。半勺清泉醒道骨。一雙屏幃護天香。黃冠不改舊時樣。素面全殊今世粧。群卉衆芳凋謝盡。此間獨可艷吟床。

除日書事十二韻

佳辰事從厚。非敢致豐奢。饋歲資纔了。傳生酒又賒。中庭鋪翠毯。破牖補輕紗。鏡樣丸新餅。月團分嫩茶。園翁供綠橘。魚戶餉紅蝦。蔬甲鹽微蘸。薑芽醬少加。掃爐添獸炭。換水插梅花。炊爨飯初熟。蒸烹餚既嘉。余姑拋筆硯。妻亦廢笄珈。但喜寒威薄。其如日脚斜。先知明旦霽。爲見暮天霞。拮据具粗辨。欣然遲曙華。

○明治四十五年壬子○七月改元大正

松上鶴勅題十二韻

蒼髯長百尺。丹頂壽千年。託跡於高處。結巢其絕巔。引吭聲嘹唳。矯翮舞蹁躚。龍影月中動。琴音風裡圓。和鳴意何極。偃蹇勢無前。萬卉難同類。群禽可比肩。幸居清禁地。近接御爐烟。雨露毛逾潔。冰霜節益堅。乘軒真偶爾。封爵亦徒然。不遇斧斤害。豈爲贈繳牽。宸題當獻歲。聖藻入新篇。永映蓬萊日。得將天詠傳。

自詠

百年何幸值明時。顏巷不憂寒與飢。鉛槧之餘無雜好。圖書這裡結幽期。置藩以後三千卷。志學而來一萬詩。自愧微功猶未就。漫將遺逸送生涯。

明治元年秋季。藏書盡委兵火。二年置藩後。購三千餘卷。予年十五。學作詩。至明治四十四年之冬。六十年間得。一萬二百餘篇。

新年寄太田耻堂二首節一

雨雪其雱歲聿周。無端白戰憶同儔。東京地暖春風早。有此瓊林瑤樹不。新年多田北溟寄詩乞和次韻以酬二首節一

東坡詩集卷之二  
官途豈敢羨鶯遷。拭去幻塵心鏡圓。夙好惟書真巧妙。新裁無句不清妍。何圖更受金蘭契。未見先蒙錦字箋。報道來游將有日。人人待駕問東仙。

屠蘇

秘藥聞從紫府傳。新嘗歲旦幼爲先。絳囊浸酒氣濃矣。靈液崇觴春盎然。豈止室家蠲癘疫。兼之身體益強堅。不論飲著殿將最。同是得年非失年。

閱辛亥詩稿

一年三百有三首。多是感傷閒適詩。但以雕蟲爲事業。可憐畫餅了生涯。消除老境題新句。細想曾遊詠舊知。自改自吟還自笑。霜鬚撚斷幾絲々。

贈內妻近病雙

布衣操作度昏曉。身體健強如少小。重聽何傷卿莫嘆。耳聾母乃長生兆。

內子招近隣女子開宴

女曹人日笑相迎。石鼎新茶當酒觥。春軟翠眉舒弱柳。風和嬌舌嚙雛鶯。老妻爲設盤遊飯。少婢因烹谷董羹。餘興不窮天旣暮。歌牌剪燭鬪輸贏。余少壯羸弱。動感時邪。老後反健。蓋攝生之要在節飲食省思慮耳。

人或譽余云。君有嬰兒之色。因賦此以似。

瘦軀康健未知疲。反勝壯年多病時。豈必老饕貪軟膩。惟緣省慮少營爲。盈虛通塞任其運。飲食起居從所宜。孫子四休當學也。榮公三樂得兼之。人云君爲嬰兒色。自顧我非松柏姿。善攝元來無異術。養而不害卽吾師。

閒居雜賦自遣十首節三

僻處春猶淺。終朝雨雪零。纔容蝸有舍。略似蟹無腸。爵養薑芽紫。溫存橘子黃。果蔬勝肉味。可以侑杯觴。

松筠圍屋密。白日轉蕭疎。左計從人笑。閒居讀我書。但令尊有酒。不嘆食無魚。處世安吾分。終年意晏如。

斷年無事役。燕息過殘冬。酒猶含臘味。梅已入春容。漫作蘇門嘯。而兼叔夜慵。一區閒寂境。愜我素心胸。

男松治二女花子寄小絨襯衣

羊毛宜老骨。組織巧無痕。皺皺伸還縮。蒙茸柔且繁。披來輕輦々。着處暖溫々。總適體肥瘦。和融春意嗅。

長女春子寄海苔茶

芳名藉々世間誇。淺草海苔菟道茶。二物老來尤愛嗜。函封郵致自京華。

三女瑟子寄桐屐戶鈴余老健出遊妻近病聾

桐屐一雙鈴一牧。與妻相見笑顏開。山行得々踏雲去。戶響鏘々知客來。

漫言五首節三

好惡何嘗定。中含取舍情。樸因無用免。雁以不鳴烹。禍福真難測。炎涼焉可并。應須安若命。莫受外患撻。

彼蒼高默々。世路險風波。昨日手堪灸。今朝雀可羅。盛衰俄若此。倚伏果如何。各有來由在。真成春夢婆。

人世貴仁義。終譽誰庶幾。呂尚休漁釣。夷齊採蕨薇。易迷飢與飽。難辨是將非。俗士眩名利。千秋具眼稀。

人皆誇達識。往々自囚拘。借問鼂生智。何如甯子愚。鳩拙遭時笑。龜靈見或刳。苟能遊物外。外累畢生無。

次韻杉原夷山寄詩。一以答酬。一以述近況。二首

達觀誰似老蒙莊。悟了人間禍福場。野鶴閒雲心自遠。春蘭秋菊筆還香。生來畫癖豈其癖。醉後詩狂不是狂。更有著書傳世上。姓名爭得與身藏。十弓園圃郭南莊。是此東仙自得場。五株楊柳眼俱碧。一樹梅花神與香。隱處便知當日錯。吟魔只剩少年狂。老龜不作清河使。至竟深泥甘六藏。

山下養中挽詞

貧窮與藥不求償。仁術今時誰敢當。厭世終乘仙鶴去。傷心只見杏林芳。淒涼恨月沈西海。慘愴愁雲鎖北邙。兒繼箕裘門若市。果然積善有餘慶。

松治遊鎌倉寄地圖閱之作十絕節五

儼然千古鶴岡祠。霸府繁榮彼一時。此地往年經過處。觀圖便作再遊思。金湯不改舊河山。無限興亡是此間。往事茫茫向誰問。雨花春冷古禪關。分跡難通奈閱墻。秋風古驛跡荒涼。脊令無影暮雲暗。憑弔陳情源九郎。何人率土不王臣。入幕荀生贊業新。大權自屬武門手。虛器徒持七百春。兄弟恩殊兩翠娥。孤鸞雙鳳遂如何。縑絲今日秋風客。粧鏡他年春夢婆。

新年夢羽峯南摩翁

寢門哭慟猶如昨。終不可諉空緬思。夢裡三逢新歲月。枕頭又見舊容姿。  
已無發藥治詩病。其奈雕蟲類墨痴。一旦君乘仙鶴後。何人大雅爲扶持。

答松治丑藏見寄丑藏寓小樽

東京與北海。寄至數行書。驚訝風氣異。觀了思有餘。遙念繁麗地。寒與臘  
俱徂。公園新煦動。御溝濃綠鋪。梅花風開落。楊柳烟漫糊。香羅拾翠隊。綺  
騎遊春徒。歌臺暖響起。酒閣春聲呼。肩摩人如織。紅塵漲九衢。顧念涸陰  
地。積雪動丈餘。嚴凝海水凍。慘澹草木枯。蛟龍蟄淵窟。熊羆僵谷嶠。大地  
皆一白。宛如住冰壺。土人盡瑾戶。商賈不趁虛。血凍殆墮指。噓寒欲脫鬚。  
挾纊凜如鍊。熾炭相依於。我境居中間。迥與兩地殊。天晴暖差動。雪少冰  
還無。柳將弄金縷。青眼微々舒。梅將呈玉頰。芳魂稍々蘇。午坐暄晒背。夜  
座冷擁爐。些暄些寒際。適此老大軀。東京暖灸手。北海凍裂膚。裁書報兩  
處。鄉思各何如。

對雪懷亡友柳所松翁

雨雪宵來過。輕盈一尺奇。淒風飛絮徑。初日落梅枝。將欲追新賞。無端憶

舊知。松翁從凍釣。柳所鬪寒碁。兩友歸黃壤。餘生嘆白髭。良儔難再得。往  
事苦尋思。情念綿々切。年華草々移。曾耽光景好。今日反成悲。

詩稿寄恥堂副以長句進退格

一幅詩章未見還。又憑雙鯉寄新翰。數投木李君應厭。欲索驪珠意不閒。  
唱和曾思元與白。隨從窃擬孟於韓。驩朋海內多凋謝。今日向誰求善刪。

大坂應浪華某索

山河僅剩舊城溝。巨鎮依然據上流。市井今居三府一。咽喉長占五畿頭。  
穀價高低推此地。舟航輻湊冠他州。富饒海內應無比。土俗猶懷豐氏不。

對雪有感二首節一

白雪無偏覆。因人各異觀。內筵賢謝傳。僵臥老袁安。擬絮終難著。爲鹽不  
可餐。若堪餐與著。天下免飢寒。

七十五吟

我年五十賦歸田。今茲七十又加五。廿五年間何所爲。以遨以嬉不憂苦。  
富貴在天安吾分。門橫獨木室環堵。不謂無地可立錐。主領詩書圖畫圃。

東仙詩集三編 卷二  
吟花嘯月春又秋。行藥臥遊晴與雨。有時釣水或採山。往々樵漁與爲伍。偶憶曾遊懷親交。閉目倒指默自數。長於我者今無幾。少於我者多歸土。顧我何幸老而強。一飽不嗟貧且窶。涵濡長爲明時民。壤可擊兮腹可鼓。人生百歲以爲期。廿五年間合邀嬉。

口號

柳困花痴未覺新。園林蕭瑟艷陽辰。晚風又送西山雪。無賴春寒著莫人。

檢詩稿第二句用放翁詩句

我々嗚吻忘寒飢。六十年間萬首詩。自喜千金如獲璧。曾無一日不裁詞。肺肝嘔出李長吉。夢寐翹思杜拾遺。多讀多爲猶未至。肯言得失寸心知。

四月七日汽車赴東京途中七首節二

天寒河北梅猶在。地暖河南櫻已開。纔隔一河寒暖異。袷衣換着絮衣來。朝發霞城七十程。日斜猶未達東京。兒孫上野待應久。車似却行心獨行。

遇妹鐵子話舊

我居鄉里汝都門。往事追思一夢痕。剪盡春燈談不盡。七人兄弟二人存。

京遊二十首節五

歌樓舞閣醉青春。不是豪商卽貴紳。百萬人繁麗地。誰知中有凍飢民。

右東京

牛女祠前晚靄勻。金龍山畔月光新。雙々柔艫趨潮去。幾個春舟載醉人。

右墨水

櫻岡三月雨方收。亂發櫻花紅雪稠。繡帽金釵春雜選。何人爲弔古南洲。

右上野

蛟龍徙宅海波枯。鱗介處沙相响濡。我與兒曹提籠去。獲來尤物互歡呼。

右芝浦陰曆三月三日

爛漫千株傍岸斜。重葩單瓣相交加。此遊初見櫻多種。開遍紅黃紫白花。

右荒川

四月二十八日。兒松治生日。內集十二人。曰內子梅子。子婦茂子。孫忠雄。菊子。秀子。蕙子。妹森田鐵子。長女三上春子。二女木野崎花子。三女根來瑟子。詩以記之。

此日是何日。此辰是何辰。二璋與六瓦。妹婦妻與身。也。我一家十二口。環坐喜津津。綠酒紅豆飯。醉飽意欣欣。曉雨新晴好天氣。滿庭風光潑眼新。花萼韡韡映日發。烏鳥嘖嘖近檐馴。舞勺弄鳥次第起。填箎琴瑟參差陳。女孫唱出南山曲。三疊相和擊節頻。乃翁雖老童心在。戲謔不敢讓兒孫。詩成高詠飛唾玉。書成亂灑翻墨雲。盛宴如斯難數得。內集不復欠一人。遲遲春日不覺永。宴初於卯過於申。人生有樂々何限。不如家庭叙天倫。何以爲紀念。命工共寫神。笑貌醉態躍然現。喜色灑々霽於春。各取一枚揭梁楣。長當一家聚首看。作詩記月日。永矢不可諼。明治四十有五年。四月念八兒誕辰。

讀新聞紙

一國代議士。選舉非容易。可察賢與否。不可拘門地。當其選舉時。投票賣買多。只視賄多寡。不問人如何。朝助某黨去。夕變某黨來。眼中無一物。黃白爲之媒。富者乘其機。散財如土芥。菽麥雖不辨。占得投票最。意氣頗揚揚。其實等乞丐。通士賢而才。徃々乏資力。縷述民利弊。曲陳國得失。其言

雖痛切。不能解蒙惑。是故充撰者。曠々陋且醜。議決賴私黨。不顧事當否。惡得理財政。惡得興民利。爲貪一朝賂。反受他日累。朝廷求理切。所以開兩院。特與參政權。朝野求俊彥。雖然求俊彥。毋乃藍縷選。誰能副朝旨。讜議無私便。選舉被選舉。弊莫甚今時。何以除其弊。當路知不知。

題畫

修篁繞草蘆。風葉亂扶疎。燈火隱還見。何人夜讀書。

鶴感

風神灑落本超然。世上凡禽可比肩。警露有時空嘹唳。冲霄無處不蹁躚。聲高春月西湖上。夢迥秋宵赤壁天。舊侶從興稻梁念。樊籠換翼幾多年。

鶴答

慣住雕籠寬似天。籠開時又出蹁躚。秋高月下恣清唳。日永花陰儘靜眠。狎世長無羅者害。乘軒特受主人憐。稻梁至味君知否。絕勝澗棲苔與泉。

詠史五首節二

故老能談百戰勳。機山遺烈到今聞。學童一自知名分。飲食又無稱館君。

身翁不敢究存亡。漫道城傾身亦僵。勳舊諸臣相擁護。終生韜晦薩南鄉。

朱舜水祭

萬里乘桴請援軍。運傾難掃犬羊群。秦廷濺盡孤臣淚。湊水傳稱絕世文。不恨旅棺藏異域。曾逢禮待號徵君。明時弔祭魂應慰。況有後昆來拜墳。

卽事

閒門日永客蹤踈。睡思差催午飯餘。立向階庭洗松竹。歸來又讀夕殘書。

偶書

栗花庭院微雨。青草池塘亂蛙。翠烟一縷輕颺。隔竹西隣焙茶。

漁家樂

妻解結罾網。兒能爲釣鉤。烟波三萬頃。天地一孤舟。魚蝦饒似土。身世眇於鷗。長免菑畚苦。而無凍餒憂。嘯歌閒日月。蓑笠舊弓裘。不識興亡事。全家儘自由。

農家苦

所願免逃亡。孜孜耕與桑。稅租逾厚歛。收入不能償。動輒逢飢餓。何曾有

積倉。窮難辨通債。豐豈勝凶荒。樂歲終身苦。三時抵死亡。昨朝過城市。雞犬飽膏粱。

梅雨寄鼎厓

滂霖天合漏。安得倩神媧。怪菌生枯枿。嬌芽茁濕柴。栗花薰戶隙。梅實落池涯。黃犢攀粘壁。綠衣跳上階。酪奴醒懶睡。局子遣幽懷。詩就令誰和。皮筒寄鼎厓。

自咏

無訝屋廬窄。不求衣食豐。閒情憐野鶴。高舉想冥鴻。唯作遊娛計。自稱潦倒翁。苟能知止足。何達復何窮。

感遇五首

布常無藝苦徵科。奢侈成風浪費多。興業殖財徒藉口。不知功課果如何。賦稅年年增額頻。能除弊事有誰人。同徵電話電燈費。富益富兮貧益貧。議員僉是富家兒。課稅不關時盛衰。未見一人持讜論。滿場和附便其私。貧人稅重富人輕。舊債未償新債生。一括家財付公賣。籲天無口不冤聲。

其奈豪商私自營。富貧相待共治生。貧人戶口追年減。豈獨富家長保榮。

謝伊藤武壽送櫻桃

雅愛分珍菓。緘封驛使傳。盛來透籠美。瀉去滿盤鮮。燦々絳霞簇。纍々紅玉圓。初看濡燥吻。未喫墮饑涎。丹肉纔離核。瓊漿忍下咽。荔枝當避舍。桃子詎齊肩。曾聽味殊勝。果知甜可憐。我今將自種。摘食是何年。

棘蠶

浮遊傍御船。赤女醉應顛。紫鬣傾籠健。紅鱗照姐妍。作湯尤澹泊。斫膾亦珍鮮。他物和宜忌。孤行味在專。不知勝負氣。每見咽饑涎。沒齒無遺骨。流匙直下咽。銀鮓當落後。錦鯉曷爭先。消受老饕福。三朝腹果然。

移竹

新梢猶帶粉。凜々歲寒姿。剛破用辰日。栽培乘醉時。聘來何必臘。分得只其雌。愛養親澆水。護持因挿籬。孤君招二子。他日產群兒。生意終無損。虛心似不知。已抽棲鳳節。稍長化龍枝。憂玉清風起。篩金好月窺。經霜色逾潔。當暑冷相宜。塵氣自然絕。休言俗匠醫。

自詠

窮通各有天命。不繫才將不才。素履消除妄想。終身無害無災。進未嘗厭市井。退何必戀商山。心苟忘乎物我。所居無不仙寰。

高橋東江。明治四十一年。關園種桃。名曰武陵源。求余題詩。今年桃初結實。遠寄數十枚。詩以謝之。

關武陵園後。栽培歲五周。今年初結實。九夏正垂頭。挈籠親攀摘。封函遠寄投。未餐消渴舌。乍見洗昏眸。離核頰膚美。剝皮丹液流。味勝朱仲李。色壓石崇榴。惜向安仁擲。恐遭方朔偷。枇杷何足憶。橙橘不須求。充體似劉阮。得仙思葛由。詩成謝珍貺。飽餒任毫酬。

奉悼詞五首節四

聖壽願齊嵩。鼎湖今墮弓。天崩下愁雨。地覆起悲風。晏駕辭宸極。登遐遷梓宮。蒼生何寡福。泣涕訴皇穹。德將天地合。覆載乃并容。儉己以豐物。足兵而務農。飛潛蒙化育。含哺慶熙雍。宵旰齊其政。治功光祖宗。



赫々維新業。旋乾而轉坤。韓臺歸版籍。清露服戎軒。立憲協中外。宣猷貽子孫。兆人增孺慕。四十五年恩。

悼陸軍大將乃木伯諱希典五首節四

梓宮遷幸出宸時。視死如歸奚復疑。二子致躬征露日。一門忠孝昊天知。鼎湖從駕所曾期。文武夙遭先帝知。忠烈尤堪興士氣。英靈永合護皇基。馬革裹屍銘肺腸。此心非敢負今皇。時平報効終無地。可以殘年窃寵光。神州正氣爲扶持。何必臨軍革裹屍。易地楠公其揆一。建碑須配湊川碑。

歲晚酒米價貴

飲水曲肱聊忘飢。熊魚至竟可兼之。市酤不賤貧難醉。穀價逾高晚未炊。嬾性愛閒常謝事。退居委順豈干時。哦々也被老妻哂。細和陶公止酒詩。

壬子除夕

坐看殘曆對爐薰。餞歲匆匆景已曛。潤筆錢償除酒券。撚鬚吟擬送窮文。生來瓠落何攸得。世上蠻爭百不聞。妻補春衣余舊稿。寒燈一盞又平分。東仙詩鈔三編卷三終

東仙詩鈔三編卷四

岩代 二本松

竹內貞誠甫著  
松治鈔錄

○大正二年癸丑

癸丑歲朝

斗柄今朝正指寅。有愁何惜歲華移。百年方遇休明運。四海仍當遏密期。不見千官朝紫極。絕無萬戶揭章旗。門前客少晝蕭寂。觸感咨嗟入小詩。

次韻夷山見贈

閒雲歸岫鳥辭樊。抱甕龜陰事灌園。胸次苟能遺物累。世間無處不仙源。鵬程久矣雄飛息。蓋簡依然夙嗜存。賴有良朋知我意。區々可與外人言。岡崎南田贈畫松一幅。祝古稀壽。賦此爲謝。

妙手參化工。下筆風雨快。當其畫松時。見松不見畫。直幹凌雲勢。天矯欲化龍。畫松妙如此。難於獲生松。千里遠相寄。開處起風雨。恍疑飢龍吟。或

恐破壁去。高操老彌勁。知君寓意深。欲遣散樗性。學此後凋心。

夢太田恥堂詩以問之

昨夜夢耻堂。同爲詩酒遊。相州一百里。忽然落枕頭。覺後猶如夢。恍疑在相州。覺耶將夢耶。非夢見無由。人生渾是夢。夢亦與覺侔。疾於縮地術。得慰索居愁。因憶相南地。風氣最和柔。君今遵醫術。養病柳島樓。目明看嶽雪。耳爽聽海流。耳目兩清曠。體適心休休。康強倍曩日。豈止宿痾瘳。閒來何所得。物外何所求。消受山水福。能吟能飲不。報問投木李。不惜瓊瑰酬。

一月念三日大雪贈四休霞城十四韻

長空何漠々。大地忽漫々。遠近來無際。縱橫落不乾。潛光投戶隙。作態舞檐端。室暗疑天暮。窓明訝月殘。蕭條陰景逼。料峭歲華寒。浩蕩銀波漲。玲瓏玉樹攢。鮮將欺魯縞。潔以比齊紈。對此詩情促。兼之酒興闌。聯吟懷舊伴。縱飲念同歡。一醉自雖遣。相思爭得寬。知君催賞詠。會友共團圓。航戰互馳逐。文刀工剖鑽。倘蒙摛藻贈。可當盍簪看。候問呈燕石。休言屬和難。白香山有吟四雖詩。年雖老。命雖薄。眼雖病。家雖貧。云々。因倣之。

人々異其樂。樂歸快吾志。顧余何所樂。所樂惟有四。碁雖劣娛心。詩雖拙攄思。茶雖苦清神。酒雖薄暢意。循還消閒日。不曾及他事。身上無牽纏。心中無憂累。是此四雖樂。以得長自遂。

題詩卷

十卷災梨棗。今裝五卷成。烟霞堪遣興。風月尙關情。唯作老餘樂。非求身後名。篇章逾萬首。略足譏平生。

自得二首

委順當修養。悠悠送旦昏。熊經何必學。火棗不須殮。從遣他人笑。謾云惟我尊。心身長自得。自得也天恩。霜染鬢絲白。花生眼力昏。消閒親蠹冊。送老美蔬飧。深信接遲好。誰知拙養尊。不嘗求分外。自得也天恩。

一月二十八日妹天津至留宿予兄弟七人而五人即世

齒髮衰頽歲月更。形骸潦倒莫相驚。連宵夜雨重談舊。一穉春燈復達明。百里山河勞遠夢。五人弟妹入佳城。老吾與汝共強健。悲往喜今不耐情。

偶成

春寒奇峭臥蝸廬。閒放日將人事疎。近有村童來請業。老餘還授兔園書。  
新年寄兒松治

老懷迎歲若爲寬。渭樹江雲望幾般。墨水梅花春合動。龜陰雨雪臘仍殘。  
家居自就桑榆暖。旅食遙思桂玉寒。尺素託魚無別語。但應努力且加餐。

梅花五首

冰爲肌骨玉爲顛。素服清粧絕俗埃。落後雖云群卉殿。率先母乃百花魁。  
風搖烟際依稀見。春促枝南次第開。淑女應無孤寂恨。姮娥夜々訪樓來。  
畢竟高風不可攀。超然本合在仙寰。託根白石清泉裡。交影孤松修竹間。  
午夜蟾光珠映水。一聲鶴唳雪盈山。詩家月旦爲三友。秋菊春蘭難與斑。  
不嫌歲晚近寒稠。鍊石心腸良自尤。昔相詠歌饒韻致。須磨禁榜亦風流。  
春回積雪層冰底。夜白高山流水頭。詞客武夫皆賞愛。除櫻花外蓋無儔。  
爲嫌紅紫俗葩繁。不待東皇雨露恩。春淺杉田香世界。風薰月灑雪乾坤。  
自然清貌誰描寫。卓爾高標難著論。天向此花應破格。故先鄒律返芳魂。

貌枯神澤占春溫。一點曾無朱粉痕。不厭薄寒侵玉骨。何須藉酒暖冰魂。  
瑤笙吹徹月邊徑。翠羽驚飛雪後村。自去逋仙知己少。暗香疎影幾黃昏。

酬友人見寄次韻

判袂霞城歲月經。書來知汝謝勞形。性情元是甘薑桂。鉛槧今猶伴雪螢。  
四海風塵雙眼白。百年天地一衿青。他時相遇期何處。七里灘頭小釣舡。

題友人居

築室林丘三兩間。一牛鳴地隔通關。庭栽春夏秋冬卉。窓納東西南北山。  
出樹泉聲新雨歇。穿簾花氣午風閒。衡門不鎖長蕭寂。只有白雲時往還。

我愛十二首節三

我愛好文木。冒雪益精神。一花破蕾處。天地始是春。不愧好文名。能伴貧  
儒貧。

我愛蟲隱者。相馴洋々乎。不知獮獺害。不慕鯤鵬徒。遊泳安其分。勺池同  
太湖。

我愛凌波仙。輕盈微月前。得水能開花。佳名非偶然。依稀水上影。母乃捉

月仙。

二月二十七日夷山遭盜記其事見示因和韻寄贈

都門卜居十歲餘。不向朱門曳長裾。董帷孜孜耽講讀。楊家屹々事操觚。綠林白晝恣掠奪。時其亡也負置趨。歸來怪訝戶牖啓。室如懸磬無餘儲。我始聞之駭且嘆。終乃喜之略陳愚。昔者柳州賀失火。今我賀盜勿爲辜。橫括衣物悉無有。其害過於回祿虞。禍福從來塞翁馬。盜也母乃爲君譽。君不聞天將降大任。必苦心志餓體膚。忍飢忍寒彌勉力。百物於我土芥如。術業從今益上達。名聲顯赫動全都。嗚呼梁上君子雖太暴。難奪先生腹笥萬卷書。

蘭亭集字十一首與諸子同賦節四

盛時尤可樂。癸丑是今年。宇內無懷地。人間自得天。風流修故事。觴咏會群賢。氣朗春之暮。放形殊快然。群然同契集。以極視聽娛。古竹清陰合。春蘭躁氣無。興懷隨所遇。趣舍不嘗殊。終日爲言詠。幽期信樂夫。

及期爲是會。會不異山陰。春朗幽人室。風清靜者林。向山相列坐。觀水或同臨。自放終無得。慨然嗟我今。

生遇右文世。老爲游放人。地異蘭亭地。春同癸丑春。風懷曾有契。感詠豈無因。短引不能盡。况其言亦陳。

書歎

無情草木亦含悲。天地蕭森逼密時。聞道風流千石令。觀花遊宴醉歌姬。

偶述二首

僻性從來酷愛櫻。櫻花歲々役吟情。今春空過櫻花節。我與櫻花太瘦生。午床攤飯到昏鐘。不耐鬱陶愁思濃。蝶舞鶯歌何得意。春風莫謾笑吾慵。

杉原夷山寫春筍一幅見寄二絕以報節一

淇澳千竿貯滿胸。毫端現出錦綉容。寸餘自具凌雲勢。佇見他時化作龍。

送春

欲繫餘暉竟末由。韶光瞥爾付東流。落花飛絮春云盡。慙雨傷風晝轉幽。薄被輕寒因酒病。鬢絲禿榻奈詩愁。憑誰諦取如々理。何處鐘聲鎖暮樓。

初夏園居雜書五首節二

清和四月初長。雇得園丁作事忙。持鋤旋鋤栽藥圃。引泉新築養魚塘。  
麥芒未吐愁無雨。桑眼纔舒怯有霜。小憩踞床天欲午。一鐺山茗且同嘗。  
薰風一夜綠成圍。清晝人稀事亦稀。榆莢生錢難換酒。楊花吐絮不充衣。  
老鶯春盡無多語。倦蝶夢醒猶懶飛。淨掃桐陰移午榻。坐看爐口篆烟霏。

四月二十日。先考三十七回忌。先妣十七回忌祭。四首

一夢茫茫卅七年。曾從庭訓事韋編。此心能達泉臺否。七十六齡持舊甌。  
白頭耽讀尚孜孜。空廢蓼莪十七莪。欲慰幽魂斯一事。不忘和膽斷機慈。  
欲陳微志淚潺湲。難報仁慈生育恩。繼守龜陰舊廬地。七人兄弟二人存。  
弟妹來將追遠期。回思往事共傷悲。聊修淨供拜空位。不及承歡菽水時。

龜陰吟社創設第一會賦似社友

才將詩力老逾衰。退處龜陰二十基。白首叨爲吟社主。且忻諸彥不吾遺。

次韻藤森弘庵物外雜題六首節三

深居捐末事。心境澹容與。所樂良在茲。此意與誰語。擾々趨炎徒。心火自

煎煮。

隱棲不擇地。城市亦山林。苔徑無塵鞅。只有鳥跡侵。居處隨心靜。休閒地  
淺深。

棄組二疏歸。擲竿呂尚出。從來出將歸。未免有意必。簞瓢樂其樂。心休則  
身逸。

次友人出郭詩韻

綠樹連村野水斜。閒遊任脚忘途賒。行將胡蝶相先後。一路薰風黃菜花。

夏日枕上龜陰吟社席上限韻

白日北窓高枕眠。踈松冷竹伴閒緣。華山隱士若相識。笑謂東仙亦睡仙。

哭妹天津二首節一六月九日

六人弟妹五人亡。只汝與吾俱健康。一夕遺吾俄易箠。餘生誰共話心腸。

漁父詞集古人句

細雨斜風一釣磯。鱸魚知比去年肥。青箬笠。白蓑衣。點檢初心幸未違。

納涼

洪中橋畔好徜徉。白石清波晚杳茫。月出岩峰風露冷。納涼人反怯過涼。  
哭太田耻堂二首 七月九日節  
神戶初傾蓋。蘭交卅五春。情逾膠漆固。分是弟兄親。鴻鯉往還數。詩文酬  
唱頻。今朝寢門外。哭慟淚盈巾。

蟲

爬搔難安寢。嗜膚來突如。凝觀將捕獲。跳竄不躊躇。饕餮肉爲食。蟄居床  
作廬。纜驅還忽到。無策可清除。

題馬場芳洲新居

卜得菟裘地。霞城第二關。新居依爽垲。白日轉幽閒。俯瞰千家市。平臨十  
里山。自然人事遠。不必羨商顏。

夏日偶吟

誰解無爲消暑方。冰山圍坐漫誇張。虎湯羊酪亦多事。只是心閒身即涼。  
浴後即事

林檐瀟灑夕陽傾。浴罷快然神思清。欲棄殘湯且停手。庭前無處不蟲聲。

安達雜詠并引

酷暑困人杜門默坐。無以自遣。安藤掬月賦郡內山川古蹟十二首見  
寄讀之又閱郡誌。想其盛衰興廢之故。不能無所感焉。遂和之。增賦得  
三十五首。節三

甌峰高聳碧霄間。羅列如兒郡內山。氣象儼然何所似。真人正笏紫宸斑。

右安達太良山

獨眼龍來布陣營。潛兵欲夜襲霞城。深宵有石爲雞唱。咄々豈其非惡聲。

右雞石 伊達政宗攻二本松右京陣此地。

昔日藩兵操鍊塲。清時夷險又芟荒。狐嗥鼯嘯荆榛地。化作稻梁雞狗鄉。

右青田原梅原親固等請官開拓。

秋夜讀書吟社課題限韻二首

一領舊氈忘夜寒。金風吹入讀書欄。青編有味情何飽。白首無成齒又殘。  
四壁蟲聲秋欲老。孤窓燈影夜方闌。千秋不變中天月。照徹高人古肺肝。  
陰蟲切々夜漫々。兀坐凭梧欲睡難。厚價他年誰市骨。朱門今日豈彈冠。

疎燈細字幸能讀。舊篋遺經殊愛觀。老業呬唔猶未廢。儘教人作腐儒看。

秋夜書感吟社席上分韻

燈垂暗蕊又添油。冷入臥床加敝綯。瘦菊含愁秋易盡。閒蛩弔夢夜初脩。  
老來閱世尙青眼。歲不待人空白頭。遯跡衡門當守分。晏然無復一朝憂。

杉原夷山見訪有詩次韻爲謝

知己天涯若比隣。惠然枉駕繼前塵。素交長結芥針契。深誼不遺樛櫟身。  
清風握手又今夕。白首談心能幾人。祇恨爲歡纔半日。勞々脂轄去何因。

中秋與吟社諸友限韻二首節一

桂花無影雨如塵。不見清光出海垠。誰遣姮娥違素約。應緣屏翳妬良辰。  
強憑杯杓澆愁去。數出牀幃望漢頻。歌舞六街聲徹夜。陰晴介意幾多人。

芳洲招飲席上賦似主人

度公樓上豆觴陳。媿々清談酒幾巡。碧芋剝衣鮮似玉。佳蘇斫膾白於銀。  
新詩不就何須罰。快飲無厭任吐茵。主人今夕亦爲客。呼取嫦娥爲主人。  
十月八日與佐倉孫三話舊明治四年別孫三今四十餘年

四十星霜夢裡移。髮邊看我雪絲々。如今子亦形容改。老後情深於少時。

十月二十三日長女春子歸寧二首節一

倒屣相迎笑貌溫。問無恙後叙寒暄。欲說離居無限思。同牀喜悅總忘言。

四君子節二

不求千畝廣。根自渭川分。數竿吾意足。可以比封君。  
玉蕊先春發。冰姿冒雪新。曾無人好詠。只有月傳神。

行藥

老來事行藥。得々出柴扉。身因行藥健。健故行藥宜。任意不卜日。興至出  
無時。間步不擇地。荒尋本無期。登涉無遙邇。山阿又水涯。觀花緩酌酒。聽  
鳥間吟詩。清晨先鴉出。薄暮乘月歸。佳境得者我。幽懷知者誰。青芒鞋一  
輛。紫竹筇一枝。笋皮編晴笠。油紙製雨衣。只求行藥具。非敢要多資。其具  
如此足。餘事無營爲。衣食委老妻。有無不曾知。身世任天命。彭殤復奚疑。  
杜老曾有云。人生七十稀。我今七十六。心力未全衰。自思爲行藥。其効遂  
如斯。老妻若爲情。回頭笑問之。假使未爲是。尙應不爲非。

東傳詩集三編 卷四  
秋盡龜陰吟社席上分韻  
草々秋光盡。蕭然深掩關。烟收明遠水。木落露前山。不覺晷差短。因斯心  
轉閒。所愁寒又到。筋力老逾孱。

澤庵漬

鳳胎鸞脯那須論。至美冬來有菜根。鹽漬久藏香自淡。釜烹不用味偏繁。  
老饕每食惟憂盡。細嚼生津未覺煩。一事無成違夙企。白頭猶記古人言。

雪夜友至

天散鷺毛添逸興。君披鶴氅枉幽尋。樽中竹葉十分溢。庭上楊花三寸深。  
厭々夜飲燭餘跋。娓娓清談春滿襟。白戰不須徵故事。醉來隨意短長吟。

十二月十五日舍弟忠告三十三回忌辰

夜雨同牀憶昔年。星霜三十有三遷。老衰今尚保餘喘。來與兒孫忌祭筵。

癸丑除夕

喜入燈花欲鬪妍。梅鬚菜甲共新鮮。筋骸猶健餘生足。衣食粗供百事捐。  
老眼不眠同守夜。全家無故又除年。舢船灑灑波光暖。早已春風到酒邊。

○大正三年甲寅

甲寅歲旦

出海雲霞一夜新。霜髭七十七回春。到頭犬馬年尤長。落後屠蘇盞漸巡。  
但喜鶯花無負我。自誇筋力尙如人。隨時行樂從今好。布韞青鞋烏角巾。

歲首獲兒曹書

鵲語報歡初日天。賀正書札自京傳。一男三女孫十二。彷彿音容現眼前。

早春寄夷山

墨水壯遊蹤已陳。何時文酒重相親。老來漸少同心侶。林下長爲獨詠人。  
白屋青山無俗跡。疎梅冷竹屬閒身。報君僻處今如許。不似京華繁麗春。

人日小集

靈辰風雪歇。占候喜須知。碧筭調羹美。金花作勝奇。新晴人是日。小集客  
能詩。何必策良駟。尊前坐詠宜。

送小澤幾次郎之臺灣

不受區々世網牽。男兒所志豈徒然。一朝更展圖南翼。直向荒炎萬里天。



春初漫吟

浮沈得喪隙中塵。咫尺墻東穩寄身。書課睡程間事業。詩囊茗器靜緣因。人能恕我由無我。我不如人豈怨人。偶爾尋梅消息去。一枝方遇劈頭春。

寄多田北溟

雨雪山城寒去遲。悵然感舊苦相思。曾知作字適而婉。又見裁詩新且奇。綠酒談心歸昨夢。清風攜手復何時。浪華聞說春光早。爲寄江頭梅一枝。

謝友人送酒

爲療渴相如。遺來醪一斗。舉君浮蟻杯。澆我談天口。賢聖樂無窮。金蘭交更厚。玉山忽已頽。不覺幾濡首。

孤坐無聊偶得七十七年頑健身句遂作疊韻五首節三

七十七年頑健身。碧翁應憫善居貧。兩忘眼底榮將辱。一掃胸中想與因。閱世無如親酒聖。謀生太拙遠錢神。園纔掌大栽花柳。粧點幽棲隨分春。桑苧家風栗里身。從來委順不辭貧。浮遊雁木人間世。寄傲烟霞物外因。業障未消詩入夢。眠魔忽伏茗清神。盆梅破蕾籠鶯囀。共領閒中第一春。

老慵尙愛不瞿身。素履何須賦逐貧。處世厭嘗雞肋味。退居得結鵲巢因。燒丹却粒非吾事。寡欲無爲用谷神。看取天公含養篤。閒花細草亦皆春。

謝芳洲惠梅花

東風吹冷雪欲臻。雲閣垂々暗江津。荒園老梅芳信晚。陰緘凍鎖未覺新。簾幃低垂春寂々。料峭餘寒襲衣巾。此際無物慰吟意。爐坐無聊度朝曛。名園玉蕊故早發。數枝割愛幸見分。應藉培養愛護力。不然爭得先回春。屈將姑射清淨身。來伴龜陰冷澹人。那異貧馬逢一豆。還如寒厨得八珍。插之銅瓶好調護。數換新泉殊勤々。無塵自清雪骨格。得水倍王冰精神。留燈爲當庾嶺月。廢香不生博山雲。絕俗高姿坐臥見。壓巖清芬晨昏聞。作賦才拙空曳白。愧非東閣孤山倫。花縱不言應解意。一笑相對如逢君。

春日遊友人別墅分韻得尤一字到九字

遊々雨霽風柔。前臨水後擁丘。魚翻素鷺。鳥弄嬌喉。踐約共來訪。開筵又欸留。分韻字張詩陣。折花枝當酒籌。西園今日不相讓。綠野當年有此不。富貴功名渾均夢幻。布衣韋帶可傲王侯。人亦曾云人世行樂耳。相逢一

觴一詠送悠悠。

春日書感龜陰吟社限韻首尾吟

萬事惟應一笑空。春光瞥眼亦匆匆。池塘芳草有情雨。庭院落花無賴風。真僞難知翻舌鳥。苟容爭及叩頭蟲。閱來世上榮將悴。萬事惟應一笑空。

哭岡鹿門

儒林卓犖八十霜。一夕悲風碩果亡。禹域觀光遠馳譽。尊攘紀事最流芳。春晴芝浦共遊舫。夜雨霞城同臥床。誰使明時終不遇。丹心報國有文章。

春江垂釣

萬頃春波塵事疎。苔磯一半與鷗居。桐江釣渭水漁。不知心跡果何如。

春望

水緩山舒淡靄籠。鶯啼蝶舞百花紅。春光一幅天然畫。總入先生指顧中。

花下酌月吟社課題分韻

月下呼花爲主人。花前邀月當佳賓。有花有月閒廬夕。撒盡活櫓觴豆陳。

月十六日書感二首

綠野堂深謝俗塵。名心未死贊皇綸。姦人刺客不爲意。曾爲邦家賭一身。將相官民各不和。廢公趨利噫如何。謝安今日出山處。除得年來積弊麼。

上巳與芳洲同觀舊和田大夫別墅櫻花別墅在東雷神。今爲某氏所有地。慶應紀元上巳。予與大夫觀櫻宴。距今五十年。三首節二

心字池荒冷細漪。檐傾壁破半塵絲。園林伐盡桑畦闢。只有櫻花似舊時。醞藉丰姿歲々新。觀遊樓指五十春。白頭今日花知否。恐認吾儂爲別人。

題某新築書樓

俯撫飛禽背。平臨移嶽頭。沈寥星斗近。縹緲蜃樓浮。居占高而爽。地依清且幽。遐蹤攀綺里。隱所勝菟裘。萬象繞雙楹。群山歸寸眸。天光梧上動。雲影硯心流。委順無微累。全眞儘自由。詩書敦夙嗜。杯酒遣閒愁。盡謝人間事。誰從物外遊。超然塵瑤表。巢許爾其儔。

端午

團圓長少宴。佳節古風存。角粽香浮甌。蒲醪綠溢尊。金槍朝日耀。章幟午風翻。尙武是天性。况緣童習淳。

落花

可堪塵土澆豐肌。曾占春風窈窕姿。艷色惱人能幾日。芳齡如幻不多時。玉環飛燕消香骨。漢殿唐宮勞夢思。自古名姝嗟薄命。一彈指頃盛將衰。

梅雨杜居觀畫憶及往時漫遊中景勝題以絕句得十首節四

潮生月湧夜闌干。萬點青螺鏡裡寒。三十年前松島泊。宛然似此畫中看。隔河三十六峰巒。樓閣參差暮靄端。鳧水秋風沾醉夕。宛然似此畫中看。汀松倒影映澄瀾。返照猶明富嶽端。遊跡曾經三保浦。宛然似此畫中看。平湖萬頃鏡光寒。隔水遙峰落月殘。曉霽嘗登三井寺。宛然似此畫中看。

松魚龜陰吟社課題限韻

杜鵑前夜叫。食指早朝搖。入肆價何論。典衣羹可調。莫專稱棘蠶。不足憶江瑤。休以無鱗斥。紅肥味最饒。

夏夕

浴罷微涼透髮絲。露臺啜茗歛昏時。殘霞一抹紅如燒。明日炎蒸可判知。

食冰龜陰吟社席上闌韻

今時夏造冰。何必藏陵陰。寒光射眼冷。銀液沁齒深。蘇醒煩渴肺。炎毒爭得侵。

海水浴同上

六月炎天海氣淒。隨潮遊泳類鳧鷖。鬢絲仍與眼光白。皮肉渾將面色鰲。滄腸興羸君休問。一洗煩蒸汎々兮。

八月十日松治歸省二首

百里行程半日過。相看欲說事多々。欣然出迓柴門外。先問妻孥無恙麼。不覺驕炎夏日長。懇々情話忽斜陽。暑天海遠鮮魚少。小摘園蔬共酒觴。

八月二十三日宣戰詔下皇師陸海向膠州灣

天兵陸海議環攻。灣內髯奴勢已窮。々鼠嚙猫何可侮。定應持重奏全功。

果園即事

果木新栽地半弓。年來培養漸成叢。秋風甘至可生喫。梨頰含黃柿頰紅。題前赤壁圖。分清風徐來水波不興爲韻。得水字。每句挿賦中字。一葦憑虛天若水。匏尊更酌洵樂只。無盡藏中無盡期。清風明月屬蘇子。

秋日雜吟

宿志蹉跎祗自憐。又逢秋色轉淒然。芙蓉紅瘦西風晚。蟋蟀聲寒暮雨天。  
齒髮衰殘身已老。滄桑閱歷骨將仙。回頭同調今無幾。知己誰能託後賢。

田園雜事

地僻林深人跡稀。栗披紫殼草花肥。採收還向市街鬻。薄暮買將鹽米歸。

絕句

芳齡元有限。零落亦無常。不必須吹却。春風意那忙。  
滄溟杳無際。何處是鄉關。皎々一輪月。出於三笠山。

讀新聞紙四首

議院數爲排日論。軍民皆化愛錢風。漫誇往昔與英媁。省否今無和聖東。  
乘時欲達積年圖。反過來攻乃徒都。城下之盟猶不雪。那翁今日有知無。  
謾稱兵備冠坤輿。陸戰初知名實虛。勿謂海軍殊銳利。一朝遇敵亦何如。  
掀天大戰未曾聞。獨力能當聯合軍。報道露兵尤善鬪。全然勝負預難分。

釜中魚

釜中魚。生殺在我汝何如。汝欲生乎我全活。汝欲死乎我剪屠。生死一從  
汝所欲。汝過決之勿踟躕。我皇仁明戒將帥。不須急擊與濫誅。使廣威信  
自歸順。更生邊氓荷來蘇。海陸皆兵逃無道。孤壘捍禦兇而愚。兵食彈藥  
餘幾許。糧道阻絕援軍無。執迷拒守必噬臍。一舉戡定不須臾。自其忍恥  
爲禽虜。孰與乞降被惠孚。嗟哉乎釜中魚。釜中魚。餘命無幾相啣濡。

絕句次廣瀨淡窓韻

映山帆影白。江上落暉收。登眺何邊好。橋西有酒樓。

狂花

百卉凋衰處。獨侵霜露披。猶如狂簡士。負俗不逢時。

重九友至

今日舊重九。七十有七回。何以酬佳節。獨坐意徘徊。豈料君命駕。袖詩携  
尊來。移榻就籬菊。偶坐吟酌催。老妻辨下物。炙鱸煮芋魁。便把君詩誦。又  
把君尊開。不須登高去。共舉黃花杯。曾來重九宴。今日最快哉。

龜陰幽居偶詠

智者多憂慮。愚者多勞劬。非愚亦非智。卒歲澹容與。春曉鶯呼我。秋宵月伴余。閒吟又閒酌。幽懷得常據。夏臥北窓風。一心付空虛。冬負南榮日。四體頗和舒。持此聊消日。不肯思其餘。不知愚與智。心事果何如。

青島陷落十一月六日夜進擊七日朝陷落

豈止人驚鬼亦驚。謀攻忽拔虜連營。六街今夕祝全捷。萬點燈光月失明。  
二本松町。爲挑灯行列。

我武維揚五大洲。堅牢諸壘一朝收。曾聞獨虜如蛇蝎。廟議應勞善後謀。  
有感

恐嚇滿清強且頑。到頭難奪膠州灣。多年經畫徒勞耳。天道不差真好還。  
殘菊吟社課題限韻

肯將凡卉共摧殘。寄語靈均不可餐。皇室徽章霜下傑。勿爲節後等閒看。  
書事

巨艦衝濤屹若山。驅除獨將數旬間。南洋諸島狂瀾斂。無限恩威服遠蠻。  
讀書偶歎

踈慵拋百事。書癖不能醫。卷盡還重展。程終且細思。自知垂老日。有味勝兒時。隨讀隨遺忘。無如記性衰。

數日不出信筆雜書六首節二

龜陰臘月值牢晴。洒掃中庭燕坐情。天近有霜梅信早。窓新糊紙夕陽明。酒雖無量不濡首。詩詎堪觀聊遣情。地僻居幽塵累少。長閒自覺此心輕。好事能來掃榻迎。笑談娓娓慰幽情。數尋隈水釣徒約。耐久龜陰吟社盟。醉裡詩詞猶跌宕。閒中歲月任嶮崢。泥龍舊侶今無幾。賴被後生憐老生。

時事有感

國際邦治多事秋。協同可以贊皇猷。西歐兵亂幾時罷。東亞妖氛何日收。衆論未決增師案。傍觀爭知對外謀。廟議勿爲私黨誤。草茅竊抱杞天憂。

吾詩

吾詩何所主。觸興遺懷襟。勿問工將拙。難兼古與今。更無新伎倆。只是舊呻吟。不足追時好。他年誰賞音。

題壁二首

光榮何必羨凌烟。負郭先疇足給饘。筋骨清癯如老鶴。心胸冷澹似枯禪。  
客看書畫却寒具。僧乞碑文分玉延。賴有交遊方外侶。時々來往樂殘年。  
帳密爐深暖似春。東窓坐臥自由身。已無事物能爲累。祇有梅花不諱貧。  
歲稔村翁分餽餼。天寒樵父送烏薪。三冬睡過君休笑。至竟頑慵是我真。  
馬上逢雪吟社席上限韻

閒遊乘欸段。放鞚出塵函。風入鐵蹄疾。寒侵吟骨嚴。天低飛雪下。野曠凍  
雲緘。繚亂花繁蠶。輕盈絮著衫。踟躕騎白鳳。蹀躞縱冰銜。何必灞橋去。詩  
思自不凡。

冬夜茶話吟社課題分韻

盍簪同調友。小院夜蕭騷。地白繁霜降。窓明凍月高。重茵依火閣。芳茗當  
村醪。熾炭起松籟。安甌生雪濤。更深談娓娓。坐暖意陶陶。不覺留歡久。隣  
雞埒上號。

東仙詩鈔三編卷四終

東仙詩鈔三編卷五

岩代 二本松 竹內貞誠甫著  
松治鈔錄

○大正四年乙卯

乙卯歲旦次文衡山乙卯元旦詩韻

初陽鵲語吉維傳。物象渾隨候節遷。戡定膠灣饒雨澤。招降獨虜歛狼烟。  
已過太后升遐歲。方遇今皇登極天。省事只餘閒筆硯。稱觴先詠祝堯篇。

春初偶詠

池北三間小草廬。漫將踪跡託耕漁。防寒銅鑪晨烹粥。排雪筠籃午摘蔬。  
一飽不揮求米帖。新方閒讀養蠶書。無災無害真天幸。安分全家常晏如。

花信龜陰吟社分韻

小寒時節值乍晴。至後初知春意生。二十四番從此始。一花風信到梅英。  
贈宇多四休

不話人間窮與通。烟霞雪月醉吟中。君年七十我加入。酒分詩腸約略同。  
步園

冰融雪盡較暄些。偶向丘園岸帽紗。出谷鶯兒猶未識。春風消息到梅花。  
題畫

不知誰所住。亭子枕清湍。滿地梅如雪。斜陽鶴影寒。

訪梅

聞說江南春已回。清晨無伴獨徘徊。雙不借。一母追。又爲梅花踏雪來。

自遣

端居二月下重帷。料峭餘寒花較遲。隨分琴書堪自慰。等閒樗櫟被人嗤。  
一身幸得兼三樂。晚歲何須作五噫。只有遊情消不盡。待他風詠浴沂時。

春江吟社席上分韻

江頭三日雨。新漲拍堤平。楊柳金絲濕。桃花錦浪生。衝岸嫩鷓躍。穿沙郭  
索行。澹烟橫釣渚。風遞棹歌聲。

絕句

江堤綠濕楊柳。村店紅蒸杏花。浪靜漁舟不繫。風收酒旆方斜。

釋奠吟社席上限韻

歲々上丁日。春秋虔且恭。洋洋和樂奏。秩々豆籩供。祭享循常典。衣冠肅  
禮容。果賢堯舜遠。萬世仰師宗。

春寒花較遲與吟社諸子同賦韻得微

近來晴日少。寂寞鎖林扉。彼岸寒猶滯。今朝雪又飛。幽谷鶯難出。烏衣燕  
未歸。數披花曆檢。芳信與期違。

春風萬里同上

習々從暘谷。冲融遍九垓。雁辭湘浦去。燕趁海帆來。隨處物皆茁。何邊花  
不開。吹噓無厚薄。天地淑光回。

垂釣圖二首

富貴浮雲今古情。一竿風月萬緣輕。軒裳不及蓑衣好。莫道辭劉是釣名。  
昨坐苔磯今廟堂。人生出處又何常。不知牧野鷹揚後。憶否磻溪舊釣璜。  
有感

心胸勞日夜。出貨到多藏。有子罹貪禍。一朝猶厚亡。

偶成

小々園庭和氣舒。年光隨分到茅廬。春陰不散風無力。護得櫻花十日餘。

東照公三百年祭

禋祠三百歲。廟貌煥煌々。偃武崇儒術。禁奢持國綱。齊桓非可敵。嬴氏自招亡。多士維新業。來於名教昌。

忠魂碑前

屹立忠魂兩石碑。千年遺烈感人思。疾風一陣花狼藉。想見露清鑿虜時。

與賣花翁

花比人家別樣奇。知翁培養得其宜。風流貿易從今始。一束芳菲一首詩。

寄滄洲

世事雲浮念々灰。微吟淺酌是閒媒。綠陰幽草夏猶嫩。好日薰風暑未催。門徑蕭寥無過轍。窓軒瀟灑絕纖埃。今朝煮酒新賒得。不得與君同一杯。

寄東京友人

老來時序速。觸景感還新。壯綠初生夏。殘紅尙表春。居幽如在野。晝靜自無塵。何日休官去。同爲林下人。

食筍與吟社諸子同賦限韻

玉版露春芽。饒涎迸齒牙。蕨薇何足比。鮭菜莫漫誇。燒煮兩皆絕。新鮮尤可嘉。蔬中爲第一。每食飯還加。

梅雨寄友

蒸鬱雨如霧。冥々暗野塘。敝衣朝釀醖。腐木夜生光。杜戶非遊日。盍簪思對床。能來閒話否。一盞與君嘗。

遊深堀溫泉溫泉。陰規引之十文字。戊辰兵火後引之深堀。

何邊清暑好。西嶽試登探。靈液骨如換。雲山心所耽。浴餘無個事。睡起又清談。忘夏兼忘俗。條然樂意酣。

七月七日隈川垂釣

垂竿箕踞石磯頭。柳際風清夏已秋。羽沒牽綸機又後。只貪芳餌不吞鈎。中元展故友墓



頻年親友泣松楸。白首中元歎舊遊。一勺寒泉香一瓣。寸衷能達九泉不。

漁父次芳洲韻

江湖滿地興無窮。磊々生涯眇々躬。萬頃烟波秋浩蕩。孤篷霧雨曉空濛。從來鷗社主盟處。不入官家租賦中。菰飯藜羹吾分足。一竿曾趁志和風。

秋日寄友

高秋灝氣滿江關。目斷孤鴻落日間。廿歲貧交存白髮。何時比屋共青山。人生體健真難恃。世事雲浮好是閒。一紙寄將消息去。草堂靈亦待刀環。

題綠筠軒詩鈔筠軒善丹青

零落交遊追悼頻。焚香展卷又沾巾。詩關世教篇々活。畫運天機筆々真。同調無多空自歎。九原難起與誰親。新編世上相傳誦。託得百年身外身。  
筠軒詩。自書自贊溪山裡。欲託百年身外身。

本町谷舊藩主別莊

舊君遊息地。追想歲年遐。竹石秀而野。林泉清且嘉。遺蹤饒古趣。故構去夸奢。往事茫如夢。空城鎖暮霞。

林花。諸老多凋謝。微臣鬢著華。

老健

清癯孤鶴似。頑健少時如。步不須斑杖。視猶便細書。傍窓移野竹。抱甕灌園蔬。勞逸適筋骨。神和體自舒。頽齡七十八。任意更狂痴。俯仰身雖老。登臨脚未衰。山樓觀月約。雪舫釣魚期。行藥勝嘗藥。出遊曾不辭。

老饕

桑落浮春蟻。雨前收雪英。和糖橙爛熟。注醬蟹微生。甜芳松罩飯。脆美菊花羹。老饕惟求飽。其餘不挂情。易牙應結舌。燮理得新方。生啖美鱸膾。熟烹溫腐湯。濃搗山藥滑。細搗木奴香。抱腹便微哂。任人爲飯囊。

十月十七日與社友遊本町谷

林莊諸彥集。此日舊重陽。落帽忘華髮。銜杯發老狂。霜微楓葉未。節至菊花黃。高會可無記。慚吾藜藿腸。

飛行機三首節一

操縱自由高不機。文明技術太精微。漆園傲吏應驚怪。直向晴空無翼飛。

十月十日。與安部并梅叟山田修。應伊藤彌招。遊百菓園。

鋤治朽壤荆荒榛。高曠園莊構造新。百果隨時交結實。群芳逐次永留春。忘機池沼鯉魚悅。遠害庭階禽鳥馴。看取主翁兼愛意。不唯獨樂亦娛人。

十月二十日。渡邊彌七。伊藤武壽。田中誠之助。三子邀飲太宗樓。酒間走筆以謝焉。三子曾遊余門。今三十餘年。

三十星霜一夢中。遠來樽酒又相同。不忘舊誼情彌厚。共話曾遊感那窮。顧我薰陶何所益。喜君樹立各成功。視如傳舍今師弟。應愧親交完始終。

十一月十日。皇上即位謹賦巴調一律

武威文德洽華夷。一系二千六百基。紹述皇謨光列聖。丕承寶祚若前規。普天照耀交旗色。率土歡呼萬世基。日嗣與霄壤無極。巴歛擬頌只傾葵。

客中秋日吟社席上分韻

故園東望白雲天。旅食京華送歲年。陶菊張鱸秋幾度。江魚朔雁路三千。

窮途蹭蹬貧侵骨。宿志龍鍾雪滿顛。自古高才爲世忌。擒蛟縛虎有誰憐。

十一月十日。良齋安積先生追叙從四位二首

鍾靈河嶽降元精。講道始終原至誠。一代雄文推泰斗。千秋墜緒繼周程。鴻才會負生前望。德業彌彰身後名。今日幸逢登極典。竊欽褒贈荷光榮。博物洽聞通古今。一朝釋褐着儒簪。才情秀似甌峯秀。學術深於熊水深。馬帳談經酬宿志。杏壇振鐸育青衿。光風霽月恍如在。永使後生爲仰欽。

水邊紅葉吟社課題分韻

映水爛如醉。染成青女霜。影蘸波生色。紅浮日耀光。立田漂蜀錦。大堰泛龍航。誰人書赤面。隨浪出宮牆。

蘋花同上

覆波萍葉似。攢簇滿汀洲。素艷藏栖鷺。清香送客舟。佳期秋眇々。矚望晚悠悠。欲採瀟湘畔。風吹不自由。

秋雨分韻得覃

滴瀝空階雨。催人秋思酣。世途多格五。人事等朝三。無復吹竽念。不爲捫

蝨談。坐聽琴筑響。靜寂似禪庵。

晴夜嘯月與吟社諸子同賦限韻

良夜難沈默。秋高月滿巖。望蟾時一發。向俗每三緘。逸響驚栖鶴。餘聲震古杉。孫登同調否。嘯隱是頭銜。

某園觀菊十韻分韻得蒸

晴暈兼雨幕。保護實超恒。絕品百餘種。奇葩幾十層。攢金還綴錦。琢玉或鏤冰。節至殊姿發。秋深異彩澄。月中清影冷。風外暗香凝。呈艷思無限。爭妍繁不勝。群芳何足伍。只竹可爲朋。秘訣定天授。名花追歲增。知君因夙好。觀者盡嗟稱。今日逢招請。他園看未曾。

十月二十日。渡邊彌七。與有志之徒。祭高山正之。徵詩。因賦二長律。以換奠藻。

跪伏遙瞻拜紫宸。三條橋上泣露巾。勤王宿志雖無遂。護國丹衷永不泯。褒贈聖時蒙特旨。精忠曠世罕同倫。安知厲鬼慶明際。陰助中興天業新。首唱勤王幾苦辛。夢耶親得拜龍鱗。只因萬世皇綱重。不省微臣性命屯。

深慨幕廷專僭恣。欲張帝室久沉淪。時機未至銜冤死。踵起四方尊攘人。

寒夜讀書十韻

寒威侵坐榻。朔吹拂簾櫳。夙慕聖賢事。曾施釵髮工。白頭勤不息。黃卷味寧窮。講讀三冬好。研攻總角同。頻挑短檠燼。稍減小爐紅。地白肅霜落。窓昏斜月空。踈才何所得。半世奈無功。雖則乖時尙。猶難貶古風。心常存這裡。樂亦在其中。自慨道將熄。人誰念此翁。

寒夜枕上六韻

黃紬被暖百骸和。幽味偏於枕上多。夜永孤燈依壁瘦。風寒飛霰撲窓過。曾來得喪塞翁馬。至竟榮枯春夢婆。豈耐浮生供把玩。須將老壽補蹉跎。無能不作兔營窟。一飽何殊鼠飲河。偶爾思詩々未就。幾回畫腹口我々。

溪橋尋梅 龜陰吟社席上闌韻

溪行無伴獨相尋。水碧沙寒境自森。傍岸微蹊縈峭絕。截流危棧插澄深。斜陽慘愴雲橫嶺。孤鶴歸飛雪滿林。俯瞰波心水影動。一枝何啻價兼金。雪達摩得韻覃。

東坡詩集三編 卷五  
整然塵不染。跌坐老瞿曇。非是折蘆寄。端應面壁參。虛心氣氣滅。慧眼瑞  
光含。暫伏空爲色。流泡默々諳。

雪二十韻 龜陰吟社分韻

裝成銀世界。極目脫塵凡。萬象合漫汗。同雲垂黯黯。川原鋪浩々。山嶽積  
嶮々。剪水頻傾瀉。鏤瓊工削剗。欺梅空的々。着柳亂影々。洒遍地凹凸。治  
平路嶄嵌。玲瓏廣寒殿。縹緲蕊珠巖。逐吹颺簾額。潛光落枕函。散鹽人孰  
鸞。碎米雀爭銜。庭樹重繁玉。檐冰倒植杉。邑彪狂吠噉。巢鵲駭咕喃。青剩  
村墟旆。白迷漁浦帆。迎賓僮掃徑。射雉客持籩。敗履留痕冷。遺編任意欹。  
紅爐茶靄暖。碧突爨烟緘。鬪巧飄歌扇。呈妍伴舞衫。興添詩律密。寒挫酒  
兵嚴。白戰幕前令。綠斟誇老饒。吟心殊慘愴。醉墨儘儼儼。賞詠忘他事。我  
戎句數艾。

讀歐洲戰報次芳洲韻

百戰二年無寸功。合從猶未決雌雄。橫天殺氣愁雲慘。滿地僵屍腥血紅。  
六國逡巡徒守禦。孤秦強暴數衝攻。不知早晚媾和議。始自軍需供給空。

韓退之藍關圖

養我浩然氣。左遷何足云。畢生排彼佛。獨力起斯文。馴致惡溪鱷。感通衡  
嶽雲。藍關深雪擁。天合欲留君。

冬日幽居雜事十首節三

北風鑿萬木。滿瓦曉霜繁。山近炭猶貴。檐低窓早昏。新醅盈甕美。古絮補  
衣溫。租賦先期了。追胥不到門。

天壽須安命。升沉也只寧。光陰雙轉轂。人世一浮萍。今古衆皆醉。江湖誰  
獨醒。遽々莊與蝶。爾汝共忘形。

老去甘恬退。匆匆芳歲闌。觀書忘愈甚。作賦廢猶難。體適氣無礙。心和夢  
亦安。湯婆親枕席。永夜不知寒。

偶憶江戶舊遊

往事悠々誰與論。豪遊結客舊江門。風流共挈東山妓。意氣同傾北海尊。  
萍水當年相遇處。雪鴻今日不留痕。故交凋謝時風變。往事悠々誰與論。  
書感

倏忽歲云暮。傷時轉愴神。松篁凌積雪。花柳待青春。白屋嬰烟絕。朱門歌吹新。諸公示清儉。奢俗自歸淳。

乙卯歲晚

滿城風雪歲云道。歷閱桑滄六十秋。鍊馬從軍歸昨夢。朱顏辭鏡罷西遊。除詩酒外無他念。出死生間得自由。何幸餘年逢聖代。山林寄傲送悠悠。

○大正四年丙辰

丙辰歲旦

大正方逢第五年。晨興遙拜九重天。千官賀壽鵷鸞列。萬國朝宗玉帛聯。韓土山河添瑞氣。滿洲草木帶祥烟。聖明不設華夷限。窃祝恩威逐歲宣。

春初屏居信筆雜書十二首節五

客少地仍僻。蕭然常掩扉。無心雲共嬾。瘦骨鶴猶肥。何管世榮辱。不言人是非。躬耕堪送老。久息漢陰機。

生涯真瓠落。功業負初期。泥古仍耽學。安窮未廢詩。長閒損末事。老健樂清時。舊友凋零盡。此心知者誰。

室中無長物。室外只青山。放意風雲表。寄蹤丘壑間。百年容易過。萬事不如閒。林茂水深處。禽魚信往還。

無毀又無譽。乾坤一腐儒。與其誇智巧。曷若守迂愚。已矣鳳兮鳳。久哉觚不觚。逢遭須任運。豈可哭窮途。

浮陽靄原野。頗覺淑光新。前夕行籩豆。今朝逢立春。梅含香頰笑。柳展翠眉顰。衰老怯寒久。時來心氣伸。

早春村行二十韻與吟社諸子同賦得韻江

新霽出遊好。晨暉映紙窓。應須桐屐着。不用版輿扛。得々閒心適。星々塵慮降。雪纔殘甌嶽。水正漲隈江。柳色遮沙步。梅花點石杠。泥乾沿岸徑。烟隔倚灘雙。麥隴交蔬圃。魚莊接釣缸。午林鶯恰々。陽渚鷺雙々。蓬僻稀過客。猗猗有吠彪。村名標路側。佛像刻巖腔。圍屋杉如幄。夾門檜似幢。境幽風簡朴。市遠俗敦龐。肅々樹雞柵。丁々椽馬椿。時方爲雜作。節未及耕耰。倦脚借繩榻。老翁供酒缸。撥爐炙枯鱸。移釜煮紅豉。莞爾酡顏暢。醺然醉語呢。欸留如舊識。快樂勝他邦。桑柘日將入。寺鐘樓已撞。欲歸情更切。相

東山詩集卷三  
朱五  
擁別春缸。

看梅二首

梅花又踐昨年期。風物蕭條歲晏時。雪塢冰崖人不至。寒香初漏一枝夕。芒鞋藜杖竹皮巾。踏雪又來溪水濱。氣格丰姿都絕世。可憐僻處看無人。

卽事

春陰不散靜無風。頓覺昨來和氣充。釀蜜黃蜂愁雨至。營巢紫燕待泥融。池塘楊柳添新綠。院落桃花綻小紅。欲煮園葵開午飲。遣童招喚比隣翁。

偶述

二月園林雨雪多。梅花消息近如何。溫爐暖帳坐終日。卽是先生安樂窩。

春江晚釣回文

平生樂意一竿輕。漾々春波綠岸盈。橫棹晚斟孤榼酒。鳴禽宿渚落霞明。

橫內直溫寄贈風樹集。日將刻續集。求余詩。賦二絕以酬。節一

守節孤孀五十春。奉親教子克居屯。千秋可以爲龜鑑。淑德芳名永不泯。

送友人之東京

赤霧城南隈水西。春風祖席別觴提。竭來何處裾堪曳。此去長橋柱可題。逸足不容甘伏櫪。高才本自屬燃犀。離情猶似萋々草。百里隨君送馬蹄。

春日雜賦疊韻十首節四

隣雞膈膊破春眠。林抄輕颺碧突烟。飯後徜徉乘霽出。一村花柳百鶯天。雨餘風暖草芊眠。數里平蕪綠似烟。冶屐遊裙相喚去。春光駘蕩踏青天。鼻觀香通醒癩眠。春風西舍焙茶烟。青裙女子歌相和。採摘旗槍向火天。此間惟合付沈眠。花事匆匆過眼烟。酒病詩愁何以遣。無情春色有情天。

春郊賞花龜陰吟社課題限韻

公園嫌熱鬧。郊野試幽探。僻地俗塵絕。群芳春色酣。紅霞蒸疊々。白雪落參々。風暖鶯吭滑。香濃蝶意貪。更無人雜選。不妨獨荒耽。豈料忘形友。相逢抵掌談。聯吟詩擊鉢。同賞酒傾巵。林外入斜照。嶺頭生暮嵐。且留歡不盡。欲去思何堪。放遣村途暝。歸筇我略諳。

春盡次芳洲韻六首節二

春不帶愁去。愁因春去生。東風胡蝶影。落日杜鵑聲。往事茫無跡。流光何

限情。殘紅渾洗盡。一雨綠陰成。  
促駕東君去。黯然離恨生。餘花纔有影。百舌已無聲。又作隔年別。何堪今夕情。榮枯須委運。水到自渠成。

惜春二首節一

修禊舞雩遊跡陳。紅凋綠慘送餘春。豈堪雨愆風僞夕。況是詩悲酒渴人。  
愁衰々來排不得。歲堂々去駐無因。暮年牢落感何限。閱歷滄田幾劫塵。

步到洪中

出郭數十步。烟波塵跡稀。沙乾便蠟屐。汗歛健蕉衣。蘋顛風徐起。江長鳥怒飛。呼盃橋畔否。墜釣鯉魚肥。

初夏田園雜興二十首次四休韻節五

百花落盡雨初晴。村北村南布穀聲。豐稔今年先可卜。田疇水足事深耕。  
瓜期昨自鎮臺還。父母在堂俱白顛。馬上三年持銃手。又驅耕犢向山田。  
放闌新流號々鳴。田塍高下穀紋生。翁分秧去兒能插。滿頃薰風綠毯平。  
薰風村巷午雞鳴。麥隴耘鋤碧浪平。藉草桑陰開野餉。蔬羹黍飯敵侯鯖。

新麥登場可啖嘗。老夫隱々轉飢腸。確磨收麩白於雪。炊裂瓊肌下箸香。

芍藥與社友同賦得韻江

薰風庭樹綠幢々。初見奇葩映碧窓。俗紫凡紅何可匹。晴香暖艷自無雙。  
殿香不肯讓西洛。先夏曾經推蜀江。白首非爲溱洧贈。寫生爭得筆如杠。

水軒夏日次四休韻

九夏無些暑。軒幽水木妍。殘陽漁去盡。鷺護露橈船。

夏日江村爲芳洲同賦

沙禽投水影雙々。梅雨新晴綠滿江。蠶麥已收偷小暇。南隣借得釣魚艫。

夏夕喜友人至

老厭炎煩出戶慵。何圖此夕得相從。月穿松過疎光冷。風度篔來爽氣濃。  
夙慧曾驚才吐鳳。新吟今見技雕龍。尊前清話歡無限。聽盡東林五夜鐘。

驟雨

潑墨濃雲忽地生。電光倏閃射窓明。望中前嶺忽遮斷。雨點未來先雨聲。

漁父次芳洲韻

舟居從所適。來往脫塵拘。漁釣無租稅。烟波屬版圖。略同鷗境界。不踏世程途。貌矣玄真子。千秋是我徒。

秋思

又聞新雁至。愁思滿河關。榮悴須臾際。炎涼俯仰間。秋憐詩骨瘦。老覺酒腸孱。江上蓴鱸美。故人猶未還。

秋感

秋風黃菊瘦。夜雨墜楓多。人事蟻旋磨。功名碁爛柯。塵緣都擺落。酒興未消磨。處世愁無益。唯當醉裡過。

鷹與吟社諸子同賦得韻灰

秋空何處不穩穩。目擊霜風萬里開。自有飛騰凌漢勢。兼之卓犖出群才。上林當殿姦禽盡。曠野方擒狡兔來。豈敢貪婪爲濫殺。寄言鸞鳳莫相猜。

江村秋夜同上

豐年無警夜開門。雞犬不驚江上村。隔渚楓烟燈漏影。半灣蘆雪月留痕。磯邊釣網漁歌起。里落春榆農語喧。小酌殊欣秋味足。炙魚煨芋酒盈尊。

得新酒

酒戶持將餉榼過。撇瀉清色似黃鵝。久藏自覺酸而薄。新釀先知旨且多。含露菊花香可掬。飽霜橙子綠堪搓。午厨采摘供閒酌。一醉頽然落突何。

雁字與龜陰吟社諸友同賦探韻二首

不論春蚓與秋蛇。水寫烟描字々佳。月下銀鈎何錯落。風前鍊畫太欹斜。秦皇烈火終難奈。蒼頡遺文莫以加。八體六書寧得擬。天成妙墨變無涯。水墨交揮整又斜。雲箋題破落平沙。數行寫出秋宵月。半幅摹來暮嶺霞。應是帛書傳上苑。不然邊信致誰家。排空體勢須看取。秃筆慚他漫點鴉。

採葦分韻得覃

分草捫蘿仔細探。探從山北到山南。松風衝鼻奇芬透。玉蓋穿苔冷露含。遽步爭先猶未獲。徐行爲殿却相參。午餐圍坐互誇示。蠟面酥莖滿竹籃。

卽事二首

露白霜紅近小春。林檎葉脫夕陽新。何來蜂子衰無力。飛落書窓不整人。新詩題罷更思茶。手挈軍持汲井華。髻亂女兒看作字。偷將不律漫塗鴉。



懷古八首與社友同賦分韻

勿來關

道遷關廢歲年賒。源將東征此駐牙。叱咤麾兵平醜虜。從容按轡吐天葩。群峯北走地形險。大海南開雲路遐。聞說山櫻化爲石。春風今日不看花。

一谷

懸崖直下掃平軍。古壘烏啼空夕曛。玉笛在腰留艷感。梅花插箠著芳勳。鼓聲長絕須磨月。旆影猶餘鍊柁雲。今日居民思往事。翠華遺址不耕耘。

平泉

掌握二州兵馬來。託言反者被雄猜。百年盛事均春夢。三世豪華付劫灰。楊柳館空生野草。金雞山兀暗塵埃。只今惟有光堂在。落日荒墟鳥語哀。

鎌倉

想見當年創業昌。依然要害擁金湯。三朝霸府掌戎政。九世陪臣持國綱。放鶴邱荒華表古。鬪契庭廢野蒿長。興亡自取又誰恨。徒使行人嗟閱墻。

稻村崎

沙頭吊古立躊躇。顧望鎌山慨有餘。沈劍丹心驅海若。投鞭赤手戮鯨魚。蒼茫雲氣連天惡。洶湧潮聲打岸虛。當日若無公輩出。六龍稅駕果何如。

芳野

行宮曾此寄安危。延得三朝五十朞。崇嶺岩巖淹鳳輦。陰雲慘愴豎龍旗。無人今日稱南北。奈運當時異盛衰。憑弔春風微雨夕。落花深處認遺基。

川中島

掀天大戰付東波。右望犀川左筑摩。麥秀黍離今若此。龍驤虎吼竟如何。二雄爭地無三里。十歲交鋒此兩河。蚌鷓相持長不決。漁夫收利有知麼。

桶峽

卒情將驕自敗多。奈其虎子食牛何。疾雷驅雨如追北。鍊騎銜枚忽突過。草沒烟埋殘戰跡。風悲月冷舊山阿。可憐海嶽三州地。換此荒蕪一塔婆。

偶步到近村買醉歸

晚風冷透木綿裘。買醉歸筇暫小留。橋畔村墟桑落熟。團々杉葉挂檐頭。贈字多四休。

妙術豈徒然。箕裘三世傳。曾持醫國手。寧貯買山錢。有暇耽詩藻。餘閒伴茗烟。盛名逃不得。屢每滿門前。

十一月三日奉賀立太子

令辰敷典命。雷出地場聲。爰正承華位。式宣守器情。前星光益耀。少海浪逾清。上德三靈洽。中孚萬國貞。謳歌傳率土。瑞氣滿東瀛。皇祚無窮極。重輝天日明。

送人罷官歸鄉

此去滄浪好濯纓。妙年詞賦動東京。秋風便惹蓴鱸興。明月空懸湖海情。初服應裁芰荷製。退居何要錦衣榮。求之今古誰相似。漢史長傳疏廣名。

十一月九日洗心亭觀楓會者八人席上作

嘉招此日又朋簪。楓樹經霜秋正深。路繞丹青屏半幅。人過錦繡幕中心。奇峯當面有聲畫。流水澗池無操琴。何況主翁能愛客。賞情不覺落暉沈。

哭安部井梅叟名磐根十一月十九日

平生師友義兼之。述德誰能作詠詞。天道難知非也是。齡踰八袞竟無兒。

次韻高季迪郊墅雜賦五疊韻八十首節十六首

靜寂龜陰地。歸休此卜居。起蠶修禊後。收茗禁烟餘。南畝看秧馬。午林聽粥魚。村々農事闌。無客過蓬廬。

卜宅意徘徊。曲溪流水隈。規模雖甚陋。築作更相催。北戶移修竹。南窓種早梅。暖房諸友至。笑語得親陪。

浮榮何足誇。一散似搏沙。卜得不毛地。移來無主花。鋤鋤以爲業。蠶麥畧供家。勿笑治生拙。素風本去華。

遺榮復遺事。踈懶與年增。不趁朱門輩。相親白社僧。雲林朝采藥。書榻夜留燈。恬退是吾性。奔趨非所能。

乘霽又閒遊。青錢挂杖頭。霜濃楓葉醉。禾盡雀聲愁。村酒好堪買。河魚何處求。孤舟眉雪叟。垂釣荻蘆洲。

投絨家資乏。惟餘舊硯田。與詩償酒債。揮筆折蔬錢。一飽幸無事。今秋欣有年。炊烟茅舍夕。采菊立籬邊。

何須問彼蒼。寄傲小林塘。秋老葉如雨。夜寒天欲霜。歸田存古業。養性得

新方身與世相遠。窮通付兩忘。  
處閒無世役。任性儘逍遙。跡已混沮溺。名何追管蕭。先霜收芋栗。未雪貯  
薪樵。隣曲往還便。門渠竹架橋。  
舍隔瀆西東。兒稱兩禿翁。往來常不絕。乞假互相通。器皿異時樣。田園存  
古風。深交無彼此。日夕笑談中。  
眼前何所有。只剩一甌青。不知麟閣貴。孰與草堂靈。龍去洞雲濕。魚跳汀  
藻腥。村厨無肉味。自比太常醒。  
東風麴塵柳。細雨縠紋波。臘後杜門久。春來行藥多。溪津呼渡立。野寺看  
花過。相遇饒歡語。時清乃偃戈。  
幽清堪自誇。屏跡脫塵沙。細雨魚吹絮。微風蝶抱花。栽瓜鋤邵圃。移柳擬  
陶家。未廢閒公事。醉吟酬歲華。  
新晴雞出桀。久雨蘚生垣。已謝折腰事。寧爲捫蝨言。桑麻自蒙翳。衡宇絕  
紛喧。移植松兼菊。躬親理小園。  
杖履日徘徊。微吟傍水隈。忘機沙鷺熟。鼓枻釣翁催。衰白頭如鶴。清癯貌

似梅。歸來携潤實。茗飲喚兒陪。

窓樞映碧湍。瀟洒竹成竿。曉露鶯衣濕。新晴燕壘乾。菜畦傭客治。林竈焙  
茶看。環堵雖然陋。好爲容膝安。

蹉跎湖海志。迂拙不容時。安貧同北郭。揣分守東陂。居僻事從簡。日高眠  
起遲。苟教衣食足。此外總無知。

初冬田家

小春天氣與春齊。秋潦霜餘痕漸低。納稼滌場功已畢。比隣相喚共修堤。

山家夜話

圍爐樵話就眠遲。夜色深沈月落時。一徑墜楓聲簌々。林厨求食有猿窺。

冬日雜賦次韻

毀譽不到曲肱邊。世事都如風際烟。枕上夢清聽雪夜。江南期近探梅天。  
閒呼局子無虛日。懶與狸奴分半氈。骨相寒癯彌老健。前生母乃小神仙。

雪意吟社席上分韻

風淒群雀噪雲氣。壓長江。謝傳預催宴。山陰虛泛艫。屢添烹茗火。且待讀

書窓斜日慘無影。床昏早點缸。

題某畫山

雲烟滄勃萬孱顏。不數倪迂范緩間。聞說信州多秀絕。君家粉本是何山。

富士山應山田某索

秀出芙蓉萬仞餘。群峯羅列衆兒如。三州蟠踞臨東海。八面玲瓏接太虛。帝賜佳名標日域。天開巨鎮壓坤輿。茫茫下界人猶夢。騰翥金鴉五夜初。

丙辰除夕

滄桑閱歷骨將仙。坎止流行任自然。牛馬風塵人易老。烟霞歲月興相牽。遐齡明屆八十壽。雜賦今踰一萬篇。體益強康真至幸。吟觴仍例達新年。

東仙詩鈔三編卷五大尾

大正六年四月七日印刷  
大正六年四月十日發行

岩代國二本松町東池ノ入六十四番地

著作者 竹 內 貞

東京市麻布區山元町三十二番地

發行者 竹 內 松 治

東京府下巢鴨村宮仲二千六百五十三番地

印刷者 篠 兼 吉

東京府下巢鴨村宮仲二千六百五十三番地

印刷所 巢園學舎印刷部

69  
103

終

